

四庫全書

經部

欽定四庫全書

經部

田間詩學卷十

詳校官監察御史<sub>臣</sub>莫瞻菴

刑部郎中<sub>臣</sub>許兆椿覆勘

總校官知縣<sub>臣</sub>楊懋珩

校對官中書<sub>臣</sub>王鍾泰

謄錄監生<sub>臣</sub>張鱗

欽定四庫全書

田間詩學卷十

桐城錢澄之撰

蕩之什三之三

蕩序曰召穆公傷周室大壞也厲王無道天下蕩

蕩無綱紀文章故作是詩也

鄭氏云通篇托之文王

能啓王之聰故異時羣之訖國人圍王宮召公曰昔

吾驟諫王王不從以及此雖驟諫者非獨春秋外傳

所載諫監謗數語蓋蕩之詩尤最危焉萬時華云

反覆說紂賈山之借秦為喻也反覆說天霍光之謂

王行自絕  
于天也

蕩蕩上帝下民之辟疾威上帝其命多辟天生烝民其  
命匪諶靡不有初鮮克有終

朱註賦也下同毛傳缺孔云此下諸章皆言文王  
曰咨此獨不然者見實非殷商之事故于章首不言  
文王以起發其意也朱註蕩蕩廣大貌辟君也  
威說文云姑之稱漢律有婦告威姑之文後因借為  
氣勢可畏之義辟通作僻邪僻也

指在位者言對上帝言故稱下民

愚按詩人見在位者之邪僻也歸其咎于上帝疑上  
帝之蕩蕩疎闊聽下民之為辟而不之理也已又曰  
豈惟蕩蕩且疾威矣似人之為辟皆上帝命之且非  
偶有而已所見皆然是多辟也豈上帝欲虐害斯世

故多降此輩以速其虐乎夫民受天地之中以生謂之命以今多辟觀之其命有不可信者矣蓋咎天之深也而卒為解之曰此其辟非人之初也乃其終也初非不善惟末路墮壞以至于此則使天命匪謫者皆人之為非天之咎也諸家皆以多辟指厲王謂不敢斥君故借言下民與書高宗彤日篇言惟天降下民意同愚謂厲王之虐皆邪臣導之如下諸章所稱者則多辟定為王臣言也如

文王曰咨咨女殷商曾是彊禦曾是掊克曾是位曾是在服天降愆德女與是力

鄭云厲王弭謗穆公朝廷之臣不敢斥言王之惡故止陳文王咨嗟殷紂以切刺之歐陽子云以下條陳王者之過惡言此等事皆殷紂所為文王咨嗟以戒于初而厲王踐而行之于後也曾是怪詭之詞

上二句曾是言何乃有是人下二句曾是言何乃用  
是人也 彊禦暴虐之臣 掎克聚斂之臣 孔云彊  
任威使氣之貌 禦猶禦人以口給之 禦 掎取物之  
名 鹽官入水取鹽為掎或云掎褻通聚斂也 克勝也  
逆取于民而民無如之何以為勝也 彊禦即下多  
慙之彊禦也 掎克即下式內之寇攘也 呂覽云厲王  
染于號公長父榮夷終其即此輩乎 毛云服服政  
事也與在位對 孔云謂非徒備官又委任之 愒  
滔同書云象恭滔天 興起也 登庸之謂滔德之人  
雖由天降亦由汝興起之故其惡惟恐為之不力耳  
篇中女而  
爾皆指王

文王曰咨咨女殷商而秉義類彊禦多慙流言以對寇  
攘式內侯作侯祝靡屈靡究

而亦女也 作詛通祝

咒通屈極也究窮也

愚按乘與柄同即柄用之謂義類猶言善類也謂王初年亦嘗柄用善人而彊禦之革轉以王聽之不專而有慙心流言不根之言也蓋不欲自己出之而引流言以對使王自疎斥之也寇攘奪劫之名即掎克之人也善人既黜乃進掎克之輩用事于內蓋酷吏與聚斂之臣未有不相濟為惡者于是毒遍海內怨謗沸騰詛祝之聲靡有窮極雖欲弭謗可勝弭乎

文王曰咨咨女殷商女魚休于中國斂怨以為德不明爾德時無背無側爾德不明以無陪無卿

鄭云魚休自矜氣健之貌 呂正獻公謂小人聚斂以佐人主之欲而不知其終為害也賞其納忠而不

知其大不忠也嘉其任怨而不知其怨歸于上也  
毛云背無丞側無人也無陪貳也無卿士也孔云  
左傳曰物有陪貳天生季氏以貳魯侯諸侯以上卿  
為貳則天子陪貳惟三公矣冢宰雖亦貳王治事當  
從六卿之列

愚按貪酷之人假王靈以肆其虐天下不之測但見  
王之威怒日行于中國其聚斂也所以為王斂怨也  
而王反以之為德周語謂榮夷公專利其即指此乎  
不明爾德由左右前後無輔導之益至爾德不明  
則舉錯顛倒以致公卿  
陪貳之重皆失其人矣

文王曰咨咨女殷商天不洎爾以酒不義從式既愆爾  
止靡明靡晦式號式呼俾晝作夜



酒誥註云飲酒齊色曰酒謂其飲酒者皆醉面色齊同也

朱註

式用也

止容止也

不義與上章義類

相反不義從式推所以酒酒之由惟不義之人是從  
是法因遂以飲酒為樂事而君臣交酒耳既愆爾止  
四句酒酒之容也

俾晝作夜視靡明靡晦更

進言其沈醉不醒雖白日昏昏然亦如夜也

文王曰咨咨女殷商如蜩如蟴如沸如羹小大近喪人  
尚乎由行內異于中國覃及鬼方

蜩蟴皆蟬也如蟬噪如沸羹皆亂意也指怨謗之聲  
前章所謂詛祝也小大近喪言民情如此大小臣民  
死喪將至尚由此而行不肯改轍

毛云

史記云王行暴虐侈教國人謗王王

醉而怒曰羹

怒得衛巫使監謗者以告則殺之王益嚴國人莫敢  
言道路以目此所謂異于中國也

覃延也按易

高宗伐鬼方詩言高宗伐荆楚則鬼方當在荆楚地  
史記楚世家云周厲王之時暴虐熊渠畏其伐楚亦  
去其王此云韋及者正謂  
峻厲之威及于遠方也

文王曰咨咨女殷商匪上帝不時殷不用舊雖無老成  
人尚有典型曾是莫聽大命以傾

不時猶言厄運舊者兼舊人舊法  
而言 典型謂典冊所載之法

愚按王不用舊以為朝無老成人也縱無舊人尚有  
舊法典型具在曾無一語可聽乎老成人即穆公自  
道併同志如凡伯芮伯之類皆是而云雖無者  
不敢自當之詞 大命以傾預卜其必然也

文王曰咨咨女殷商人亦有言顛沛之揭枝葉未有害

本實先撥殷鑒不遠在夏后之世

人亦有言即顛沛以下三語是也顛仆也沛拔也  
揭見根貌撥猶絕也沛者水之趨下之貌順其勢  
也本仆地之勢如之說文云揭高舉也蘇氏云  
商周之衰典型未廢諸侯未畔四夷未起而其君先  
為不義以自絕于天莫可救止正猶此耳殷鑒在  
夏蓋為文王歎紂之辭然周鑒之在殷亦可知矣  
愚按樹根深藏于土忽然而顛根反出于上故曰揭  
凡木之顛必根本先絕當其未顛枝葉無害人未嘗  
知其絕也迨一旦沛然而顛而所絕之處乃揭起而  
見耳民心者國家之根本也民心失則根本絕王行  
政用人如此皆鑒  
喪根本之道也

蕩八章章八句

鄭樵云三百篇詩皆可被之絃歌  
故琴中有鵲巢操騶虞伐檀操白

駒操皆今詩文又古人謂之雅琴頌琴古之雅頌  
即今之琴操琴者禁也將以禁人之邪心故以歌  
乎詩如文中子歸而援琴鼓蕩  
蕩之什乃知聲至隋未猶存

愚按厲王使衛巫監謗民不敢言王喜告召公曰  
吾能弭謗矣召公力諫謗之不可弭而亦不敢顯  
言王之虐以自涉于謗至是乃托為文王歎紂之  
辭言出于祖先雖不肖子孫不敢以為非也過指  
夫前代雖至暴之主不得以為謗也  
其斯為言之無罪而聽之足以戒乎

抑序曰衛武公刺厲王亦以自警也

郝氏云朱子  
謂武公作此

詩專以自警非也詩中侯度小子等語皆自責以告  
王昔商紂荒于酒微子曰我沈酗于酒孝子諭親必  
先自責忠臣誨君引為己過詩言溫厚故導君惟以  
自警幽王距厲王所百年矣武公為幽王卿士追維

往事以明鑒戒故曰告爾舊止日言示之事曰取譬  
不遠蓋指流彘之事也 劉公瑾云賓筵抑詩所以  
得入二雅者豈公作此二詩在于王朝為卿士  
之日而二詩之體製音節又有合於大小雅乎  
愚按武公為諸侯歷宣幽平三王之世未有不入朝  
者故賓筵之詩因朝王而見王之飲酒無度愆于威  
儀作詩以諷之此殆繼賓筵而作故亦以威儀為主  
所以自警而誨王也 考武公年九十有五卒于平  
王之十年年則平戎之歲其年已八十有三古七十  
曰耄毛氏又云八十曰耄計武公入朝時幽王昏亂  
已極正當末年公是時已踰八十矣故曰既耄詩作  
于幽王時序以為刺厲王直以篇終有曰喪厥國取  
譬不遠以厲王為幽王戒也蕩詩成厲王取鑒于殷  
此詩戒幽王取鑒于厲前車之覆轍一也以厲王為  
之祖再世而子孫不能諱其惡以為  
鑒焉故編詩者列之于厲王之世

抑抑威儀維德之隅人亦有言靡哲不愚庶人之愚亦職維疾哲人之愚亦維斯戾

朱註賦也毛傳缺抑抑密也隅廉角也方中發云抑抑自下也即下文敬慎之義鄭云人密審于威儀者是其德必嚴正也如宮室之制內有繩直則外有廉隅靡哲不愚言哲亦無威儀也職主也猶云常也疾者孔子所云民有三疾是也戾朱註反也衆人之愚蓋其稟賦之偏宜有是疾哲人而愚則反其常矣鄭云王政暴虐賢者皆佯愚不為容貌如不肖然庶衆也衆人性無知愚是其常也賢者而為愚畏懼于罪也按幽王之時上下沈湎無復威儀猶狂國之人反以不狂者為狂哲人效之亦自同于愚人以祈免禍故曰靡哲不愚第三章所云興迷亂于政顛覆厥德荒耽于酒是也興者尚也謂一時相

尚以

愚按愚字承上維德之隅更進一解靡哲不愚老子所云君子盛德容貌若愚蓋欲德之泯其隅也然所謂愚者不同有庶人之愚顛覆荒迷是也此其愚也疾為之也有哲人之愚即馴謹朴訥是也斯其愚正與庶人之愚相反者也

無競維人四方其訓之有覺德行四國順之訐謏定命遠猶辰告敬慎威儀維民之則

競彊也德行即德之見于威儀者毛云覺直也爾雅訓覺為梏梏與校通按校與覺音相近禮記緇衣篇引此詩作有梏德行梏猶校也義取拘束收斂于首抑抑二字亦似相承訐大也謏謀也定審定

不改易也命號令也遠猶者長慮却顧思其所終稽其所敝也辰告以時播告也按訐謨母見小利定命不事紛更遠猶務圖久安辰告務中時宜四者以敬慎威儀為本無威儀則民無所則此皆文具而已四國之順不可必也曹風云其儀不忒正是四國惟其父兄子弟足法而後民法之則施政頒令之故事不可以愚民審矣此與首四句相應

愚按無競惟人自勝而已不與人競也而四方聽焉一如吾有以訓之也有覺德行無以示人人自有覺也而四國服焉不期順而自順也皆抑抑之所致也二章專說前王之敬慎無競四句言前王之德訐謨二句言前王之武功功德如此而必以敬慎威儀為本以為民則文武相承何至于今不然也故下緊接于今



其在于今興迷亂于政顛覆厥德荒湛于酒女雖湛樂  
從弗念厥紹罔敷求先王克共明刑

今指幽王之時朱註興尚也迷亂于政三句一  
氣注下迷亂于政國不治也顛覆厥德身不修也總  
惟荒湛于酒而已興者謂朝廷君臣一時相尚飲  
酒從者謂從沈湎之人飲也紹謂所承之緒敷求  
先王謂廣求先王所行之道也共通作恭刑通作型  
法也明刑謂成法之昭垂者敷求以事言克共以  
言心

愚按通篇皆武公使人勅已而傲之之辭武公未嘗  
自作一語凡女者皆勅武公也韓序謂其飲酒悔過  
而作當必入朝之時王與之燕飲荒湛無度公不能  
以禮自待而悔也弗念厥紹三句即上章所言先王

之德而今弗念也所謂明刑者敬慎威儀而已義在  
諷王詞只責已女雖湛樂以下使誦者問之也謂  
女雖湛樂是從當其從時果遂百事俱廢竟弗念先  
人之緒乎先人之道謂何而女罔敷求典章明明而  
女罔克共何也  
皆問以責之

肆皇天弗尚如彼流泉無淪胥以亡夙興夜寐洒掃庭  
內維民之章修爾車馬弓矢戎兵用戒戎作用遏蠻方

皇天弗尚尚字與上興字相應言女君臣所尚如此  
而皇天弗尚也違天所尚則喪亡及之如彼流泉言  
其趨下之易也淪陷也胥皆也淪胥即皆陷溺之倒  
文也無通作毋言毋相率陷溺以至于滅亡也夙  
興七句武王所謂不泄邇不忘遠者是也自其迷亂  
于政言之凡事之大者且置不理何有細微寢興洒

埽舉細以該大也凡事在近者且或遺忘何況遐遠  
武備蠻方舉遠以該近也章表也過通作逖遠也  
愚按此章承上迷亂  
于政一句戒而勉之

質爾人民謹爾侯度用戒不虞慎爾出話敬爾威儀無  
不柔嘉白圭之玷尚可磨也斯言之玷不可為也

朱註質成也愚謂使各安本分而已與天保篇民之  
質矣同解蓋自夙夜洒埽率民以勤敬得來侯度  
者諸侯所守之法度也上專言威儀此兼以話言  
威儀形于身話言出于口皆德之符也鄭云柔安  
嘉善也王潢云柔嘉即從容中禮之謂曰無不者  
內自深宮外至大庭動容周旋之間無不中禮也  
玷缺也圭國之守器玷尚可磨猶不至于喪國  
言之不慎則危亡之禍隨之故曰不可為也

愚按威儀失者話言必乖是以賓筵懽懽之威儀與由醉之言同戒也無不柔嘉承敬爾威儀一句白

圭之玷四句承慎爾出話一句自  
此以下承上顛覆厥德而戒以勉之

無易由言無曰苟矣莫捫朕舌言不可逝矣無言不讐

無德不報惠于朋友庶民小子子孫繩繩萬民靡不承

此章極言慎爾出話之事易說文云輕也任意而言曰由言嚴氏云由言者自由之言所謂惟其言

而莫予違也

朕我也蔡邕云古者上下共稱咎繇

與帝舜言稱朕伊尹曰惟朕以懌周公曰朕復子明

辟屈原曰朕皇考是也捫持也莫捫者謂欲言之

時無人持其舌使忍而勿出爾雅云讐匹也孔云

匹敵相報也無言不讐兼善惡而泛論之無德不

報則專指言之善者下三句正承此一句而言前用

戒此下則用勸也 惠順也有德之言自然順于人  
心不獨同朝之臣僚皆以為然轉屬而下至于庶民  
亦莫不以為然也 子孫謂小子之後繼世而為君  
者此極無德不報而言之謂子孫皆食其報世世為  
萬民所順承不獨已身得報而已此謹言之效也

愚按苟字從易字來苟猶且也亦知不可言言之易  
者直曰且言之未必遽有所害而不知其言一出口  
逝而不可反矣所謂駟不及舌也 惠于朋友庶民  
作一句讀小子武公自謂蓋使誦詩者呼而命之也

視爾友君子輯柔爾顏不遐有愆相在爾室尚不愧于  
屋漏無曰不顯莫予云覲神之格思不可度思矧可射  
思

爾友君子指其所友之士大夫也。輯和也。柔謙也。顏眉目之間也。遐遠也。不遐有愆。問詞也。言當交接君子之時。既輯柔其顏色矣。而猶自省曰。得無尚未遠于愆乎。蓋常人之情。其修于顯者。無不如此。爾室獨處之地。爾雅云。西北隅謂之屋漏。曾子問篇謂之當室之白。孫炎云。當室之白日。光所漏入也。薛應旂云。屋漏非身之所處。乃心之所存。心曲隱微之地。自家照自家。慚阻略無所容。如何不愧。視公見之也。相陰相之也。郝氏云。莫予覲者。謂人不見也。天下或有人不見之地。無有鬼神不體之處。鬼神無形。往來不測。雖不顯亦臨。猶若有失。況可厭射而不敬乎。錢漚云。莊子謂為不善于顯明之中者。人得而非之。為不善于幽暗之中者。鬼神得而責之。君子無人非。無鬼責。即此意也。

辟爾為德。俾臧。俾嘉。淑慎爾止。不愆于儀。不僭不賊。鮮。

不為則投我以桃報之以李彼童而角實虹小子

朱註辟君也指武公也為德即首章所謂德隅次章所謂德行皆指威儀而言鄭云止容止也淑通作倣善也說文云叔拾也凡字從叔者皆有收斂之義僭差也賊害也舊說投桃報李以踰上感下應之理則當云投之以桃報我以李不宜云投我報之也此語似教之虛懷納善凡有進美言于我者輒思所以厚報之則聞善而嘉納可知毛云童羊之無角者也而角自用也虹潰也嚴氏云虹謂幻惑也蝦蟇不正之氣暫見于天須臾散滅愚按稱君者以君位凜之也隨呼為爾以學者訓之也通篇威儀合稱此舍威言儀者止即威也孟子云動容周旋中禮動容止也周旋儀也論語云君子不重則不威以止言也故知有威可畏者動容之事

有儀可象者周旋之事 易稱童牛之牯謂必自童時牯之禁其抵觸久而後馴今任其童而角也無復有以制之則潰亂無不至矣以見法家拂士之不可以已而忠言不可不納也小子亦謂武公

荏染柔木言緡之絲溫溫恭人維德之基其維哲人告

之話言順德之行其維愚人覆謂我僭民各有心

此章承上文反復以聽納之理言之 荏染柔貌毛云緡被也 蘇氏云柔木而被之以絲則可以為弓不柔者雖被之不從也 按柔忍之木乃弓之材以此溫恭之人乃德之基言基則其造詣有待矣是故柔木不被以弦不可為弓猶恭人不進以言不能成德言緡之絲與維德之基二語互相足也 話言古之善言也覆猶反也僭不信也語賢智之人以善言則順而行之告愚人反謂我不信民各有心二者



竟不

同

愚按哲人愚人與首章相應人之  
真哲真愚惟于聽言之時辨之

於乎小子未知臧否匪手攜之言示之事匪面命之言  
提其耳借曰未知亦既抱子民之靡盈誰夙知而莫成

此章蓋追悔其昔日不肯受教之事而責之未知  
臧否猶俗言不識好醜指其年幼未有知識之時手  
攜四句追維往日教者之切言示之事示以已驗  
之事言提其耳附耳以丁寧之也曲禮云長者與  
之提攜則兩手奉長者之手負劍辟咡詔之註謂傾  
頭與語又云口耳之間曰咡是攜手提耳皆長者教  
誥小子之常焦竑云提當音抵言附耳以教之也  
史記薄后以冒絮提文帝景帝以博局提殺吳太子

揚雄酒箴云身提黃泉皆作抵音 陸燧云知則必成夙知則必夙成不聽言則不能夙知惟自滿故不聽耳未有不滿而不夙知

夙知而尚待晚成者也

愚按靡盈言為學無有足時夙暮猶言早晚夙知而暮成言其成之易也謂即使夙知亦必終其身于學問而後有成未有但知而即成者而況乎其未有知也

昊天孔昭我生靡樂視爾夢夢我心慘慘誨爾諄諄聽我藐藐匪用為教覆用為虐借曰未知亦聿既耄

上章追咎已往此則即現在而責之言當抱子之時雖曰未知猶冀其末路有知之之日今既耄矣而其未知如故也 首二句言天道福善禍淫昭然不爽我生時恐獲罪于天有何可樂而奈何爾之夢夢然

湛樂是從也爾以為樂我以為憂我惟慘慘是以詩之諄諄爾惟夢夢是以聽之藐藐不惟不聽且以我言太多為煩苦之也是不以我之諄諄為教反以為虐矣皆作誦者之辭

愚按兩曰未知不曰無知未者言有待也少待壯壯待老今既耄矣將待何時耶

於乎小子告爾舊止聽用我謀庶無大悔天方艱難曰喪厥國取譬不遠昊天不忒回遹其德俾民大棘

此章情益急而詞益痛雖呼小子以自儆而所言皆王朝事蓋借已以諷王也告爾舊止所謂前事之失後事之師也大悔指喪國言謂後雖悔之亦無及矣曰庶無者望之也方者近今之詞天步近方艱難既有喪國之禍指厲王流彘之事也取譬不遠言其事甚近無多時也忒差也言天道禍福無爽有德者

興無德者亡終古不差忒也與昊天孔昭句相應孔昭以理言不忒以效言回邪也適僻也棘通作

輶大棘大困急也使民至于大困急者皆以德不順而威儀不慎之為害也

愚按此章特以厲王亡國之禍徹已以諷王序謂刺厲王者此也武公見王之荒酒失儀知王國之必喪而引厲王作鑒言喪國其近事也此語激切已甚不欲直陳而託其辭于訓已者之口可謂委曲深至若徒以為自徹無關獻納亦何以載諸大雅哉

抑十二章三章章八句九章章十句

楚語左史倚相云昔衛武

公年數九十有五矣猶箴徹于國曰自卿以下至於師長士苟在位者無謂我老耄而舍我必恭恪于朝朝夕以交戒我于是乎作懿戒以自徹也韋昭注云懿詩大雅抑之篇也考武公年九十五卒于平

王十三年則此詩  
適作于臨沒之年

愚按侯包云武公行年九十有五猶使人日誦是  
詩而不離于其側謂之日誦者蓋作之久矣賓筵  
之序曰幽王飲酒無度武公既入而作是詩鄭云  
入者入為卿士也史記犬戎之亂武公佐周平戎  
有功平王命公為公後儒據之遂謂以為卿士因  
以此篇為東遷後之詩夫東遷以後王已為風而  
獨此詩入雅何耶武公之為幽王卿士固無據而  
賓筵為入朝之作此詩繼賓筵而作二詩皆作于  
王朝有闕于王躬故列于二雅也據武公年九  
十五以宣王十六年即位卒于平王之十三年在  
位五十五年則是即位時已四十矣以十六年前  
合共和十四年計之武公生已十餘歲流彘之事  
所親見也厲王之虐聞諸父祖者習矣第十章所  
云於乎小子未知臧否匪手攜之言示之事云云

其即述前此  
之廷訓耶

桑柔 序曰芮伯刺厲王也

鄭云芮伯畿內諸侯王卿士也字良夫左傳

秦穆公引大風有隧章稱為芮良夫之詩篇中不敢斥言王而但斥當時執政者信用非人貪利生事以致禍亂大抵為榮夷公輩發也周語厲王說榮夷公為良夫諫不聽既榮公為卿士諸侯不享墨子亦言厲王染于繩公長父榮夷終則二人正當時之用事者也

苑彼桑柔其下侯旬捋采其劉瘼此下民不殄心憂倉  
兄填兮倬彼昊天寧不我矜

毛傳興也朱註比也毛云苑茂貌旬言陰均也說文云旬徧也按十日為旬以周匝十日言之故有

徧義 將詩詁云以指歷取也逐葉摘之謂之采牽  
枝以手循衆葉而併下謂之將邠風采芣苢采也  
猗彼女桑毛氏以為角而束之將也 劉本作鋤戕  
伐之義桑葉雖茂或將之或采之又或劉之三事并  
用則無遺葉矣 蘇氏云桑之為物其葉最盛然及  
其采之也一朝而盡無黃落之漸故取以為比 歐  
陽子云他木皆有枝葉獨以桑為譬者惟桑以葉用  
于人 瘠病也殄絕也不殄心憂曹操短歌行所云  
憂從中來不可斷絕也 倉通作愴兄通作悅說文  
云狂貌填塞也憂之極而愴愴之極而悅至于胃鬲  
俱滿塞也

愚按劉留通留者桑葉采後之所遺也而更  
將采以盡之以比取民者之無復有遺矣

四牡騤騤旗旐有翩亂生不夷靡國不泯民靡有黎具

禍以燼於乎有哀國步斯頻

宋註賦也此言厲王時數興征伐之事皇王大紀載厲王時荆楚寇于南獫狁寇于北淮夷寇于東命虢公征之不克徵斂數起虐用其民民不堪命歐陽子云四牡騤騤臣吏奔走于道路也旗旄有翩庶民召集于兵役也夷平也泯滅也爾雅云盡也征伐繁興侯國有調遣之繁故財力俱盡非謂無國不伐使皆滅也民靡有黎言丁壯從軍死亡略盡無復有黑髮之人也具通作俱禍謂兵革之禍燼說文云火餘也此句連上句中讀頻急也今云頻于險是也又水濱亦作水頻

國步蔑資天不我將靡所止疑云徂何往君子實維秉心無競誰生厲階至今為梗



朱註賦也 此章言師旅敗衄之後而當事者尚有不肯休兵之意 毛云疑定也朱註讀如儀禮疑立之疑則疑與凝通 徂即往也徂以人之往言往以所往之地言故兩文以別之 一說疑惑心也民心洶洶疑新敗之後王將復興大役而王無以止其疑咸相與驚惑曰今又將往何處乎 輔氏云居無所定則無以自安也徂無所往則無以避患也 愚按國步蔑資與板蕩詩喪亂同解國所資以立者民也人民喪亡如此將何資以為國乎 將者扶持之意天不我將猶言天不扶持所至敗衄也 君子指王言王實無與小醜爭勝之心而興兵之禍本階于用事之臣指號公長父榮夷公輩而言乃兵端既啓亂以日滋四國逆命至今皆梗化也寬王一步所以專責用事者

憂心慙慙念我土宇我生不辰逢天憚怒自西徂東靡  
所定處多我覲瘠孔棘我圉

朱註賦也 宇本屋邊之名左傳云在君之宇下言  
邊垂也 土宇可念所謂日蹙國百里也 憚說文

云疾也憚怒猶云疾威兵連禍結若天怒下民實使  
之然 嚴氏云是時鎬京在西中原在東自西至東  
無有寧居言京師及中原皆亂也 瘠病也瘠通作  
昏晉語鮮不天昏韋昭証狂惑之疾是也多我覲瘠  
言我所遇者無非狂惑之人指當時居位謀國者言  
也 圉邊也棘急也言朝廷信任狂惑之輩挑怨賈  
禍使邊垂日見告急即史言諸侯  
叛王東夷西戎迭見侵擾之事也

為謀為毖亂况斯削告爾憂恤誨爾序爵誰能執熱逝

不以濯其何能淑載胥及溺

朱註賦也 愍慎也 況滋也 言君臣朝夕講求用兵之事非不深謀不慎重也 而亂反滋國反削抑知已亂之道不在窮兵乎 爾指用事諸臣觀後嗟爾朋友之語可見蓋不欲斥言王但託之告朋友耳 恤兼憂與收二義謂哀痛民之窮而收之也已亂之道惟在恤民然非在位皆賢者誰能代君恤之故又誨以序爵 鍾惺云舊解執執作執持之意者非熟曰執熟猶云熟不可解

愚按莊子曰每況愈下況者情之似也故曰況譬亂況者猶云亂狀也言亂狀他且不知而國斯已削矣斯民憔悴于虐政之日如處湯火之中得賢者在位罷兵息民猶拔之湯火而沃諸清冷之淵也以濯解熱理勢必然若一往不解則受禍者與首禍者同歸于盡如彼舟覆其何能獨善其身哉亦相隨併及

于溺而已  
無得脫也

如彼遡風亦孔之僂民有肅心莽云不逮好是稼穡力

民代食稼穡維寶代食維好

朱註賦也 遡通作滌鄉也按鳥滌風而立言逆風也 僂咆也氣悶不得息也逆風而行其氣為風所逼悶不得出故有此苦猶民畏王之虐政喘息皆不敢舒也 肅畏懼也莽當作迸小豳篇莽蜂莽亦作迸謂斥逐散走也逮及也

愚按厲王得衛巫使監諺者以告則殺之王益嚴國人莫敢言道路以目民有肅心殆其時乎以民心如此離散可待而又多方以驅逐之惟恐不及也 民代食以力代人而食者傭耕之類言國亂已極而

尚未亡者以有力之民皆務稼穡而得食故一時不至瓦解左傳趙孟云國君無道而年歲和熟鮮不五稔以民得食也甚矣稼穡之足寶而務農之為好也

天降喪亂滅我立王降此蟲賊稼穡卒痒哀恫中國具贅卒荒靡有旅力以念穹蒼

朱註賦也前章言國之亂而不喪者以民務農業而年歲無歉也乃今加以災年是喪亂併至天亡之矣鄭謂我王所恃而立者稼穡也害稼穡猶滅王矣蟲食苗根者惡之深故呼以賊非二物也卒盡也痒病也贅屬也言危也春秋傳曰君若綴旒然與此贅同朱註立王謂所立之王疑滅我立王一語謂此詩作于共和之世按恭和之世厲王正存故詩人得以追叙其事而刺之也張道云周懿王

崩太子不得立孝王即位孝王懿王叔也孝王崩諸侯復共立太子變為王是為夷王厲王父也滅我立王當指夷王言諸侯協力以共立之王今將滅矣以指夷王其辭更痛

愚按王不恤民事視此中國土田皆身外棄物猶具贅耳今降此蠹賊所為具贅者亦盡荒矣則喪亂已成哀惘何極念穹蒼者自傷無擎天之力而空憂天之隕也民困至此而猶不叛者以田可稼穡力民猶以代食自給不即亂也蠹賊降而稼穡廢代食者無所用其能已于亂乎從來之亂未有不起于歲饑也者

維此惠君民人所瞻秉心宣猶考慎其相維彼不順自獨俾臧自有肺腸俾民卒狂

朱註賦也 此章因喪亂之極而傷其有君無臣蓋不忍斥君之非而歸其罪于執政者耳 惠順也秉心猶言存心也宣布也又偏也 猶謀也考察也慎審也相輔也

愚按厲王虐君也詩人諱之而言王本仁惠之君民人昔所瞻仰其存心亦將大有為也蓋欲徧布其謀略不令四方有阻命者故其擇相也考之慎之皆所親信之人上所謂為謀為臬者即與此相謀也而豈知所用非人以至此乎 維彼者鄙而外之之辭指用事者不順者不順于理理不順則人心天意皆不順矣自獨者言其自視獨而已目中無有二也俾使也臧善也言用獨見而欲使所為皆善何由得善也 自有肺腸不通衆志徒使民迷惑以終至于狂亂而已言必激之亂也

瞻彼中林 甡甡其鹿 朋友已譖 不胥以穀 人亦有言 進

退維谷

朱註興也并行之貌

以下皆責王臣之用事者姓姓衆多許慎云鹿性旅行按鹿欲食皆鳴相召

志不忘也

朋友僚采之稱指執政者鄭云諧不信也不胥以穀與自獨俾臧相應言惟自以為是不

用朋友相資

以成其善也言朋友已不信矣今事勢至此進而欲言恐復見惡于朋友退而不言則又

無以自安故曰進退維谷毛云谷窮也

惟此聖人瞻言百里維彼愚人覆狂以喜匪言不能胡

斯畏忌

朱註賦也此章承上章因其拒諫而斥其為至愚

也應劭云聖者聲也言聞聲知情也嚴氏云聖



人于人之言能瞻之百里之外謂望之而喻其意也  
狂惑也以是為非以非為是彼愚人不知是非所  
在反以狂惑之見自喜安肯聽言人亦誰肯言乎匪  
言不能謂我非不能指摘其愚也而于此若有所畏  
忌而不敢言如前所云進退維  
谷者何也憤極而自訝之詞

維此良人弗求弗迪維彼忍心是顧是復民之貪亂寧

為荼毒

朱註賦也 迪進也說文云道也書迪簡在王庭謂  
導引而進之也 忍心與良人相反良人主于愛民  
忍心主于害民此者愛而內之之辭彼者惡而外之  
之辭 顧還視也復重也如父母之于子顧念反復  
而不已也 言執政于良人不肯引用而所注  
念綢繆者皆忍心之人蓋不順者所為如此

愚按數建貪利之謀數興得已之役以趣民為亂皆信用忍心者所致也民本喜亂至柔而強至順而險豈肯甘受荼毒而俯首待死乎寧為云者言必至于亂也

大風有隧有空大谷維此良人作為式穀維彼不順征以中垢

朱註興也此章言執政之不順者不惟不肯引用良人且欲盡去之也大風爾雅作泰風云西風也隧與邃通謂穴之深遠者風由穴出多能害物而穴中之風本自大谷之空處來空則生風故大谷為大風之所自出以喻朝廷空虛則陰邪于中得以鼓扇其虐故不順者必欲盡空其善類而後已也式用也穀善也言良人作為皆善無可媒孽而不順者攻之愈力以其立朝大節皎然共見故索其曖昧之私

以汙之耳征與徵同索也中隱暗也垢汙穢也蓋索瘢求疵之謂

大風有隧貪人敗類聽言則對誦言如醉匪用其良覆

俾我悖

朱註興也 大風之來于隧者萬物為之摧殘貪風之出于朝者士習為之敗壞其所由者深故力所及者遠也 郝氏云欲人聽從己言則以辭色接對若人指陳時事誦說則警然不顧如醉者矣 鄭云誦詩書之言則寘卧如醉史記稱商鞅說秦孝公以帝道孝公睡而不應此類是也

愚按聽言之言與誦言之言皆同時言者一聽之則對其所言者中聽之言與言利也一誦之如醉者其所誦者詩書之言與利相反也 用者用其所聽也以吾觀所聽者匪良也而以為良是反使我之言為

悖矣悖倍通謂與時相倍也即不合時宜之謂因彼言之動聽使我之言自覺多悖耳

嗟爾朋友予豈不知而作如彼飛蟲時亦弋獲既之陰

女反予來赫

朱註賦也自此章而下皆自明其作詩之意言朋友已譖而此仍呼朋友者睠睠不已猶冀其萬

一之聽也

承上覆俾我悖而言我豈不知言之悖

于爾意而作此乎作者未章所謂既作爾歌也飛

蟲即飛鳥孔云蟲鳥之大名弋說文云繳射飛鳥

也時亦者謂弋之獲少也朱註時亦弋獲言已之

言或亦有中猶云千慮而一得也陰女張

子厚云陰往密告于女反謂我來恐動也

愚按陰女者謂陰以民情時弊告女也來赫者反以子之密語而顯言之使予為衆怨所歸也既之猶云

卒之也言予以女為朋友而親之卒之為女疎斥如此

民之罔極職涼善背為民不利如云不克民之回遘職

競用力

朱註賦也上章朋友既棄其言矣于此復言民之必亂皆有以致之使然情詞愈切義不容已也罔

極猶云不測也

涼爾雅云薄也左傳云號有涼德

又云作法於涼

鄭云職主也職涼謂晚近民心主

于涼薄善背謂善于倍上也民情如此惟宜有以意懷之而今所以為民者皆不利于民之事且如恐其

不勝而勇于為之也以是民之邪僻亦競起生心不遺餘力以為亂矣皆為民者趣之使然也

民之未戾職盜為寇涼曰不可覆背善言雖曰匪子既

作爾歌

朱註賦也民之未戾言此時民雖離散猶未至于悍然乖戾而為叛也然饑寒所迫盜賊以起漸至于為寇矣前云職涼善背夫涼且不可反可背上而善詈乎此即厲王時國人謗王之實事也

愚按終言亂勢已成女必諉曰非予為之謂民情時弊予初不知今既作爾歌言之亦既切矣爾猶不之知耶

桑柔十六章八章章八句八章章六句

申培說芮良夫傷厲

王之失國而作是詩朱子亦疑此詩之作在共和之後若共和以後國事民情尚復如此宣王其能興乎考詩辭與國語汲冢周書竹書互相出入斷作于厲王之世無疑

雲漢 序曰仍叔美宣王也宣王承厲王之烈內有

撥亂之志遇裁而懼側身修行欲銷去之天下喜于

王化復行百姓見憂故作是詩也

鄭云仍叔周大夫也按春秋魯桓公

五年夏天王使仍叔之子來聘

孔云仍氏叔字春

秋之例天子公卿稱爵大夫稱字

此言仍叔故知大

夫也以史記考之桓之五年上距宣王之崩七十六

年至其初已百餘年矣則春秋時仍叔或即此仍叔

後也春秋晉知氏世稱伯趙氏世稱孟或仍氏世稱

叔也 鄒氏云嘗考竹書厲之末年頻年大旱廬舍

俱焚會其陟也卜于太陽兆曰汾王為祟周定公召

穆公乃立太子靖為王遂大雨然則雨不係新王所

禱明矣 竹書宣二十五年大旱王禱于郊廟遂雨

此詩之作意在此時其詩曰祈年孔夙方社不莫則

泄政蓋亦有年矣

愚按小雅宣王之詩即繼文武之後以明中興之媿美于勦業也大雅于文武之後而接以成王于宣王之前而列序厲王以明中興之難倍于守成也繼文武之後者以成王守文而致數十世之太平繼厲王之後者以宣王興復甫一傳而遂有亡國之禍甚矣中興之難也故小雅猶惜其晚節之衰大雅直頌其武功之盛

倬彼雲漢昭回于天王曰於乎何辜今之人天降喪亂饑饉薦臻靡神不舉靡愛斯牲圭璧既卒寧莫我聽

朱註賦也毛傳缺鄭云雲漢天河也倬爰也倬然天河水氣也精光轉運于天時旱渴雨故宣王夜仰



視天河望其候焉左傳梓慎云漢水祥也陸氏云水氣之在天為雲水象之在天為漢今皆倬然昭明回轉于上則非雨之候也此二句與末章有嗜其星皆是同時所見倬彼二句詩人述其所見為早之象王曰以下則述王仰訴于天之辭薦重也臻至也孔云宣王遭旱非止一年言饑饉薦臻必是連年不熟也羣神即下經所陳上天下地從郊至宮之類也周禮大司徒以荒政十有二聚萬民其一曰索鬼神註云索者求廢祀而修之也按左傳凡天災有幣無牲此因日食及大水而言至于水旱薦至禱祀羣神以祈福禳災則不得不用牲也祭法曰雩禱祭水旱也註云祭用少牢孔云禮神之圭器多名言圭璧為其總稱以三牲用不可盡故言無愛盡圭璧少而易竭故言既盡

早既大甚蘊隆蟲蟲不殄禋祀自郊徂宮上下奠瘞靡

神不宗后稷不克上帝不臨耗斁下土寧丁我躬

言旱久而益甚也

蘊積也隆盛也蟲通作熾說文

云旱氣也

不殄謂既祭此復祭彼相續不絕如下

文所云也

上章靡神不舉乃擬議之詞至此始行其

禮

宮宗廟也輔廣云先郊後宮先尊而後親也

奠謂祭時進之神前座謂祭畢埋之于土凡酒食牲

玉幣帛祝冊之類皆然嚴氏云在宮之神莫尊于

后稷非不臨顧我而力不足以勝旱災在郊之神莫

尊于上帝力足以勝旱災而不肯臨顧我斁敗也

丁當也言此耗斁之禍曾是不先不

後而適當我身耶意必有以致之也

愚按寧丁我躬唐太宗吞蝗使食已腸胃亦仿

此意謂與其耗敗下土寧使災禍當我躬耳

旱既大甚則不可推兢兢業業如霆如雷周餘黎民靡

有子遺昊天上帝則不我遺胡不相畏先祖于摧

推去也說文云排也排而去之也 霆者雷之餘聲

旱久已稱甚矣而今比前更甚如霆之後而入繼以

雷也 朱註子無右臂貌遺餘也周之餘民無復有

半身之遺者言承厲王大亂之後也 昊天四句承

后稷不克二句言昊天不但臨而已似併此餘黎

亦不欲為我留也先祖非果不克也其意似于冥冥

之中亦陰為摧擠而然也 朱註

摧滅也言先祖之祀將自此而滅

愚按胡不相畏句著先祖上以先

祖見怒如此則上帝怒更可知

旱既大甚則不可沮赫赫炎炎云我無所大命近止靡

瞻靡顧羣公先正則不我助父母先祖胡寧忍予

沮止也 上章言推猶欲排而去之此但言沮僅欲其止于是勿更加益耳然而亦不能矣 赫赫旱氣也炎炎熱氣也 云我無所云雖我之一身亦無可容之所蓋言宇宙雖廣無陰以憇 何氏云承上章言黎民既盡則我亦無容身之所 大命以國祚言盤庚篇懋建大命是也近謂滅亡之期不遠正通作只語辭 仰視曰瞻謂下文羣公先正還視曰顧謂下文父母先祖言俱無可恃賴也 羣公若勾龍后稷之類左傳云封為上公祀為貴神 先正月令所為雩祭百辟卿士之有益于民者是也此皆在靡神不宗之內

愚按父母先祖當指后稷祈穀配帝之祖粒我烝民非父母而何則不我助言羣公先正固無望其我助可訝者父母先祖之忍予耳

旱既大甚滌滌山川旱魃為虐如暎如焚我心憚暑憂  
心如熏羣公先正則不我聞昊天上帝寧俾我遜

滌滌山無木川無水魃旱神也暎燎之也鄭云旱  
既害于山川矣其氣生魃而害益甚草木焦枯如見  
焚燎然熏通作薰說文云火烟上出也心憂之極  
如火之炎上易曰厲熏心是也旱之不已由我在

位也或欲使我避位而去  
則旱可止乎自怨之極也

愚按上章則不我助怪其聞我之告不能助也此則  
漠然竟不聞矣胡寧忍予怪其不見憐憫忍加害也  
此則欲求棄位而遜亦  
不得矣皆進一步說

旱既大甚黽勉畏去胡寧瘖我以旱憯不知其故祈年

孔夙方社不莫昊天上帝則不我虞敬恭明神宜無悔

怒

詎勉言力所不堪勉强為之如詎之奮怒不自量力也畏去承上章寧俾我遜又作一轉語嚴氏云

始欲遜去既又念民命方急當思救之故詎勉於此不敢去也瘕病也憯曾也說文云痛也嚴氏云

水旱之災皆由政失必有以自取之而特不知其故也知其故則速改矣說苑湯之祝山川曰政不節

耶使人疾耶苞苴行耶譏夫昌耶官室營耶女謁盛耶何不雨之極也與此意同夙早也莫晚也月

令孟冬天子祈年于天宗大割註云天宗日月星辰也大割大殺羣牲而割之又孟春天子以元日祈

穀于上帝方社指雩祭四方之神及后土言自去歲之孟冬已祈今歲之穀可謂夙矣及今已月復

行雩祭請雨之禮不為晚矣昊天上帝去人甚遠未能度我此心羣公先正皆稱明神鑒我祀之虔宜無所恨以逞怒于我何為不我助不我聞也

早既大甚散無友紀鞠哉庶正疚哉冢宰趣馬師氏膳夫左右靡人不周無不能止瞻卬昊天云如何里

朱註友紀猶言綱紀也或曰友疑作有鞠窮也庶正衆官之長也疚病也冢宰又衆長之長也趣馬掌馬之官師氏掌以兵守王門者膳夫掌食之官也毛云歲凶年穀不登則趣馬不秣師氏弛其兵馳道不除祭事不縣膳夫徹膳左右布而不修大夫不食梁士飲酒不樂周救也無不能止言無有不能而止不為也  
鄭云周當作賙言諸臣無有一人不蠲助以賙救

百姓之困急者無有自言不能而止者以此大小臣  
工皆困也何氏以此章為救旱之實政散散倉廩  
以賑濟也散無友紀所散已多不可勝紀與下靡人  
不周相應里即道里也蓋君臣勞于救荒如此而天  
意不回不知天之地幾何  
里乃居高而不能聽卑也

愚按止字與里字俱屬語辭此後二章皆祈禱之  
事因祈雨而百事不治故曰散無友紀首章言靡神  
不舉所以分遣庶正以祭百神  
靡人不周周遍也言遍遣也

瞻卬昊天有嘒其星大夫君子昭假無羸大命近止無  
棄爾成何求為我以戾庶正瞻卬昊天曷惠其寧

毛云嘒衆星貌陸氏云言旱久而繁星備見尤非  
雨之候也且正言昊天則夏之時也此章勉羣臣



祈救之勿怠也謂羣臣助我昭格于天既竭其精誠  
無餘力矣無以無餘力而怠棄爾前此之成功益求  
所以昭格者而圖之可也此豈為我一人計哉惟此  
庶正以為民之故不安久矣所求者一雨而民生以  
遂則衆正以安瞻仰昊天不知何時而惠我以安寧  
乎何氏曰我宣王自謂也我居民上一夫不獲皆  
我之責今求諸臣之為民者即為我也戾猶虐也因  
自致其不安之意曰奈何以求為我之故而戾我庶  
正乎張子曰不敢斥言雨者畏懼之甚且  
不敢必云爾凌濛初云通詩不露一雨字  
愚按戾即上章所言靡人不周祈救之事  
因勞而困苦也其寧謂得雨而勞可息也

### 雲漢八章章十句

皇甫謐以為宣王元年不藉千畝號文公諫不聽天下大旱二

年不雨據國語史記竹書以不藉千畝係宣王末  
年事而皇王大紀于宣王二年書天下大旱三四

五年書旱六年書大旱則  
非不藉千畝以後事明矣

愚按天之亡人國也必先奪其歲蝗旱是也故幽  
厲之世皆極其饑饉以宣王厲精圖治而猶降以  
旱災蓋當厲王之世天意已亡周矣宣王修德禳  
災加以竭誠禱祀僅能彌縫天意以終其世至幽  
王而亡始決錄宣王詩首列雲漢者以見王有回  
天之誠延己去之命為中興第一大業也兄子  
康曰宣王中興詩頌其武功而錄此詩于首謂王  
之能卹民也民命在歲王以新君憂旱如此其勤  
卹民隱可知即此一念足以用民  
命而奏武功以底中興之績也

崧高 序曰尹吉甫甫美宣王也天下復平能建國親

諸侯褒賞申伯焉

張文潛云周至厲王而亂極矣王  
室衰微諸侯肆行王且不能有國

而況能建國乎諸侯背叛構怨連禍而況能親諸侯乎賞命不行于上則褒賞申伯為可美也錫命不行于下則錫命韓侯為可善也揚子曰習治則傷始亂也習亂則好始治也方宣王之初可謂習亂矣而宣王之始能行天子之職詩人為樂其始治而好之也

崧高維嶽駿極于天維嶽降神生甫及申維申及甫維周之翰四國于蕃四方于宣

朱註賦也毛傳缺 山大而高曰崧郭璞云今中嶽嵩高蓋依此名 毛云嶽四岳也 鄭云四岳卿士之官掌四時者也因主方岳巡狩之事在堯時姜姓為之歷虞夏商世有國土周之甫也申也齊也許也皆其苗胄 錢棟曰四岳只為一官四國統為姜氏之苗裔耳堯典曰咨四嶽史記特稱伯夷為四岳不

及其他可知矣。嶽即周禮所云嶽山。雍州鎮也。凡天下諸山之得專以嶽名者，惟此山耳。一名吳山。舊說指四岳言者，非。凡山之高竦者，皆可稱崧。稱嶽而雍州吳山獨以嶽名，中州嵩山獨以崧名。孔云：此詩送申伯而及甫侯者，美其上世俱出四岳，故連言之。駿通作峻。山高近天，亦大。臣近天子之象，五岳之所以視三公也。一云：申、申伯也。甫、仲山甫也。甫父通用，但詩中惟仲山甫、吉甫作甫，餘皆作父。吉甫為作詩之人，則以申甫並稱者，為仲山甫無疑。或疑甫為字，申為國名稱，不類舜典稱稷契稷以官契，以名。漢稱絳灌絳以封邑，灌以姓，皆不類也。後漢劉陶云：周宣用申甫以濟夷厲之難，此詩以申甫並稱，乃統為二詩發端也。藩通作蕃。四方自四國之外，廣言之。愚按：先申後甫，明此詩為贈申伯而作。當時仲山甫名德甚重，以申並稱，蓋謂申伯可相伯仲，借山甫以

重申  
伯也

疊疊申伯王纘之事于邑于謝南國是式王命召伯定

申伯之宅登是南邦世執其功

史記申本侯爵今命之為方伯故稱申伯申國在南陽宛縣謝今汝寧府信陽州方畿云申謝相近既以謝益申厥後總稱為申纘繼也于往也何氏云時必宣王命申伯于申謝之間有所經營故先自京師而往其國邑繼又從其國邑而往謝所謂王纘之事也當成周者南有申呂左傳楚子重請申呂以為賞田申公巫臣曰不可此申呂所以邑是以為賦以禦北方蓋楚得申呂而始強所以為周室之屏翰與季氏云謝近于荆而荆與徐連舊嘗表裏為江淮諸國之患宣王命將伐荆自將伐徐于是使召虎

疆理江漢因使虎徹謝土田以築城定宅焉謝荆徐之要衝也其扼吭之慮遠矣

愚按竹書宣王五年伐荆六年王親征徐戎其年命召穆公伐淮觀其浮江漢而下則是時南國已皆就約束矣此詩疑作于未用兵之前王將有事于荆徐以申謝為南北之吭故先命申伯出牧此地以約束南國之諸侯所謂王纘之事蓋王有志而使申伯繼其事也邑者申伯舊邑也今為方伯建都不知宜于申宜于謝要擇要衝之地足以表率南國故使召伯往定其宅登進也南邦舊在化外今進之于王化之內厥惟申伯之功許其子孫世世長有此土以世守其功也

王命申伯式是南邦因是謝人以作爾庸王命召伯徹申伯土田王命傅御遷其私人

前章南國是式廟議已定中伯為方伯矣此則王始錫命之也鄭云庸功也周禮曰民功曰庸即言築

城之功朱註傳御申伯家臣之長也漢明帝送侯印與東平王蒼諸子而以手詔賜其國中傳蓋古制

如此私人家人

遷使就國也

愚按前章稱王命召伯是以于邑于謝之兩議命召伯往定之迨召伯報命既定于謝乃再命往經理其

事徵土田即黍苗篇所云平原隰清泉流之事蓋

自厲王貪暴而稅法壞盡故于韓奔亦曰實畝實籍

于江漢亦曰徵我疆土中興之美此亦可見矣私人即第七章所云徒御之類先定其名籍以待遷耳

非先使之就國也

申伯之功召伯是營有俶其城寢廟既成既成藐藐王

錫申伯四牡蹻蹻鉤膺濯濯

申伯之功指工役之事黍苗篇所云肅肅謝功召伯營之是也傲始也說文云善也蓋初始而善者也

寢廟宗廟也前日廟後曰寢專舉寢廟君子營宮室寢廟為先也貌通作邈遠也朱註深貌蹻蹻說

文云舉足行高也毛云壯貌鉤膺樊纓也郝氏云鉤者馬頷下有金鉤以懸樊纓金路之飾賜上公同

姓者也申伯以元舅為侯伯特賜以寵之膺馬當胸也樊纓九就懸當馬胸故曰膺

王遣申伯路車乘馬我圖爾居莫如南土錫爾介圭以作爾寶往近王舅南土是保

路車象路也所以封異姓諸侯者乘馬即上章所云四牡也上言馬未及車此合車馬言之鄭云圭長



尺二寸謂之介非諸侯之圭故以為實諸侯之圭自  
九寸而下考工記鎮圭尺有二寸天子守之典瑞

職云珍圭以徵守以卹凶荒杜子春云珍當作鎮  
此詩錫介圭之意王命申伯鎮撫南土使之執圭介  
而往如王自行也介圭王之守器申伯執  
此即王之威靈在焉當加寶重不敢褻也

愚按我圖爾居二句有人地相宜之義此非為申伯  
圖乃為王室圖也往近王舅二句此諭圭之詞本  
王之守器也今以錫王舅如王親行矣其與舅近猶  
與王近也敬之哉保茲南土諭圭即所以諭申伯也

申伯信邁王餞于郾申伯還南謝于誠歸王命召伯徹  
申伯土疆以峙其糧式遄其行

邁說文云遠行也信邁猶云果行也一統志云古  
郾城在今鳳翔府郾縣北十五里渭水之北嚴氏云

即董卓所築郿塢也還言復之鎬京南指謝也  
誠歸言始成行也申伯改封于謝則謝是其本國故  
以往為歸鄭云謝于誠歸誠于謝也孔云古人  
之語多倒嚴氏云申伯志存王室宣王恩隆元舅  
人疑其未必往謝故言信邁誠歸喜其果然成行也  
王命召伯是重復追述之辭言自王命召伯徹土  
田之時而已預峙其糧以供委積之用也峙本作侍  
按漢書張忠為孫寶設儲侍物以待需索張食米  
也式遄其行謂自京至國在道所需命皆預備無有缺乏故得疾至也  
愚按興地圖岐周東為郿又東為鎬其地相近王命  
申伯出牧遷謝必冊命于廟祭統云賜爵必于太廟  
名誥王朝步自周則至于豐註謂文王之廟在豐然  
則命諸侯必至豐告廟于周受命亦豐廟也告廟畢  
而送之由鎬而往  
謝故飲餞于郿也

申伯番番既入于謝徒御嘽嘽周邦咸喜戎有良翰不  
顯申伯王之元舅文武是憲

番通作皤說文云老人白也觀秦誓番番良士與  
伋勇夫對言則其為高年之狀可知徒御指車徒  
之行入謝也嘽嘽安舒言得禮也禮入國不馳周  
邦咸喜者京師人民聚觀而喜也戎猶女也周人喜  
而互相謂之辭言申伯在王朝則王朝重在南土  
則王朝益重以其外保南土而內之王朝愈安故曰  
良翰與首章維  
周之翰相應

愚按宣王封申伯而合乎人心如此以其為人望不  
以外戚也不顯三句吉甫推咸喜之意而誇美之  
雖曰王之元舅實因其有文武全才足以  
表率南國故周邦咸喜而恃之為良翰也

申伯之德柔惠且直採此萬邦聞于四國吉甫作誦其詩孔碩其風肆好以贈申伯

此章承上文武是憲來惟有柔惠之德故能文惟有直之德故能武加一且字見其兼濟之妙採說文云屈伸木也顏師古云採謂矯而正之也蓋柔曲而使之直耳萬邦即四國舉其多而言曰萬邦就其方而言曰四國按採者強者治以剛弱者撫以柔之謂此即文武之道也此追稱申伯在王朝時而言故云萬邦四國若往謝則惟式是南邦耳不得汎及萬邦也

愚按誦者工師誦之以為樂曲王朝有詩必領諸樂官被之弦誦非如尋常士大夫之徒吟咏也其詩孔碩言其所陳者皆王朝之盛典中興之大政也凡聲之足以感人者曰風其風肆好謂其詩之辭縱而意

洽蓋吉甫亦自得意于所作也申伯之行天子所以寵錫之至矣朋友之義無以為贈唯應贈之以言此即後世餞行賦詩之首唱矣從子光燮曰此雅詩也而曰其風何也詩言志當時豈按風雅之體而作乎詩者

### 崧高八章章八句

郝氏云申伯以王元舅褒封晉錫可謂厚矣未幾以幽王見黜

率犬戎殺幽王而滅宗周申為戎首焉易曰匪寇婚媾反復手之間而已父子相繼宣興幽滅可不畏哉竹書紀王錫申伯命在宣王七年又紀四十年王師敗于申則申人之逆王命已在宣王之季矣

愚按申伯是時已稱番番距王師之敗相去三十餘年則逆命者必非王舅申伯矣

烝民 序曰尹吉甫美宣王也任賢使能周室中興

焉

崧高烝民二篇皆尹吉甫贈行之詩序以為美宣王蓋人君委任得人而僚友之間賦詩以相娛樂

則人君之美莫大焉 朱註宣王命樊侯仲山甫城于齊而尹吉甫作詩送之據竹書事在宣王七年

樊一名陽樊晉語王賜晉文公陽樊之田陽人不服公園之倉葛呼曰陽有夏商之嗣典有周室之師樊仲之官守焉按仲即山甫也 山甫卒謚穆周語亦稱樊穆仲

天生烝民有物有則民之秉彜好是懿德天監有周昭假于下保茲天子生仲山甫

朱註賦也毛傳缺 烝衆也物事也則法也彜常也懿美也 真氏云盈天地之間莫非物也人亦物也

事亦物也有此物則具此理是所謂則也自其人所同更無改易而言謂之彛即書言恒性是也假格同謂天視有周昭明降格于下保此中興之天子乃生仲山甫以佐之凡宣王所以能全其性而無失其常者皆仲山甫之功也

愚按秉彛凡民所同懿德山甫所獨下文所謂民鮮克舉之維仲山甫舉之也物各有則惟仲山甫合其則故能予君以則後章柔嘉維則是山甫之自合其則也衮職有關仲山甫補之是山甫之能予君以則也

仲山甫之德柔嘉維則令儀令色小心翼翼古訓是式威儀是力天子是若明命使賦

嘉美也則即物則之則言柔之嘉處乃其則也柔非其則即不得為嘉輔廣云令儀令色柔嘉之發于外也小心翼翼柔嘉之存于內也古訓先王之遺典也式法也法古訓遜志與學是也嚴氏云令儀令色則動容周旋中禮矣猶曰威儀是力何也有德固威儀之所自形而謹其威儀亦所以檢攝而養其德也若順也賦布也順者坤道也臣道也事君盡禮順也有犯無隱亦順也將順匡救皆所謂止于敬耳如綸如綍曰命喻德宣譽曰賦書曰令出惟行不惟反令出而必求其行即賦之說矣

王命仲山甫式是百辟纘戎祖考王躬是保出納王命王之喉舌賦政于外四方爰發

前章備舉仲山甫之德此言其所居之職毛鄭以為冢宰是也自式是百辟以下至王之喉舌皆命辭



續戎祖者意必其祖曾居冢宰之職書言惟周公位  
冢宰正百官唐權德輿謂山甫是魯獻公仲子則周  
公是其祖矣朱註王躬是保所謂保其身體者也  
蓋以冢宰兼大保與喉舌言之所從出曰王之喉  
舌則是膺代言之任曹襄云出納王命即是喉舌  
之司呂氏云仲山甫之職外則總領諸侯內則輔  
養君德入則典司政本出則經營四方  
發猶起也朱註發發而應之也  
愚按發如發蒙之發四方向承厲王昏亂之餘弊政  
因循相習不寤今得覩王之明命新政初頒積錮為  
之頓  
開也

肅肅王命仲山甫將之邦國若否仲山甫明之既明且  
哲以保其身夙夜匪懈以事一人

嚴氏云此章承上章賦政之事將者奉行之義即所謂賦政於外也若順也否者不可之意上章所謂出納王命也一命之出如何而邦國順如何而邦國不順山甫具明其理順者詔王出之否則納之朱子云揚子雲謂明哲煌煌旁燭無疆避于不虞以保天命便是占便宜底話他一生只被這幾句話誤明哲只是依本分行去無一事不當理即是保身之道今人看私了必至于孔光之徒而後已愚按山甫之保身非為身計所以事一人也身保則可以長在其位而事一人夙夜匪懈蓋以其身為一人之身也

人亦有言柔則茹之剛則吐之維仲山甫柔亦不茹剛亦不吐不侮矜寡不畏彊禦

以人言起者見恒情如此而山甫不然正其異于凡  
民處茹者吞啗之名孔云不侮不畏即是不茹  
不吐既言其喻又言其實以充之何氏云見仲山  
甫所以佐王出政者寬猛相濟仁義並用各有當然  
之則澤所必加不靳于弱小故無不懷其德勢所必  
行不詘于强大故無不畏其力四方爰發有以也夫  
蘇氏云詩言仲山甫始曰柔嘉維則令儀令色此  
與漢胡廣趙成何異繼曰柔亦不茹剛亦不吐不侮  
矜寡不畏彊禦此與漢汲黯朱雲何異胡趙柔而陷  
于佞汲朱剛而近于狂如仲山甫內剛外柔非佞非  
狂然後可以為王者  
之佐當天下之事矣

人亦有言德輶如毛民鮮克舉之我儀圖之維仲山甫  
舉之愛莫助之衮職有闕維仲山甫補之

輜輕也輜者輕車之名故爾雅訓為輕鄧元錫云懿德之則如毛然微乎微者也入微難故烝民具有之而鮮其舉之我吉甫自我也儀宜也圖猶度也言我嘗于事物之間以所宜度之見山甫無不合者故知德之微處惟山甫為能舉之衮職者不敢斥王之言也左傳昔士會諫靈公曰詩云衮職有缺

仲山甫補之能補過也君能補過衮不廢矣

季氏云言此以起下章欲其遄歸之意

愚按惟山甫有是德故王朝內外之任非山甫不可我雖惜其勞而無其德不能有以助之也言外見山甫一日不可離左右東方之事不宜以勞其出也上文愛莫助之隱然是已無山甫之德不能分任其耳

仲山甫出祖四牡業業征夫捷捷每懷靡及四牡彭彭

八  
鷺鏘鏘王命仲山甫城彼東方

鄭云祖者將行祀輟之祭也業業健貌捷捷疾貌  
行者或苦于役則舉動遲緩言捷捷以見其勸樂于  
事每懷靡及言不獨山甫懷如不及事之慮維征  
夫皆然蓋山甫之急公所感也毛云東方齊也古  
者諸侯之居逼隘則王者遷其邑而定其居蓋去薄  
姑而遷于臨淄也史記齊世家獻公元年徙薄姑  
都治臨淄計獻公當夷王之世與此傳不合朱註  
豈徙于夷王之時至是而始備其城郭之守歟按  
齊世家太公封營丘至五世胡公徙都薄姑于獻公  
徙治臨淄皆在青州林氏云宣王時北有玁狁南  
有荆楚東有徐夷故式是南邦以申伯城彼東方以  
仲山甫奄受北國以韓侯其為謀甚悉而大戎自西  
作焉夫四隅而防其三其變即  
出於不備之方况一不為備乎

四牡騤騤八鸞喈喈仲山甫徂齊式遄其歸吉甫作誦  
穆如清風仲山甫永懷以慰其心

彭彭言其盛騤騤狀其容鏘鏘咏其和喈喈識其衆  
皆紀其出行在道之事式遄其歸吉甫告王之辭  
所以安山甫之心也遄

疾也言周之望仲山甫也

愚按吉甫二頌皆承王命作之以寵兩人之行而被  
之樂曲工師得以朝夕誦于王前也清風者其風  
甚微感人于不覺也穆如清風言其意思深遠可以  
意感而不可以言宣惟山甫自知之按誦者質言之  
也風諷也意在言外嵩高誦王寵命而以諷申伯母  
忘王之寵命也此篇誦山甫以諷王謂山甫宜在王  
側不宜有城齊之命故皆為風

烝民八章章八句

郝氏謂吉甫作詩以備獻納非僚友送行私情也周衰諸侯強

僭繼世不由天子裂封啟土悉自己出齊遠在東隅區區境內之城郭必以上請則宣王中興之烈足以震疊之也夫子刪詩存烝民春秋之義也

愚按文王城朔方必以南仲宣王營申謝必用召伯而城東方特命山甫蓋以其城所關係于王國者甚重非親信之大臣不任使也王命山甫本非出之于外山甫亦非重內而輕外者比也惟吉甫以王躬為國本望其在朝朝夕納誨不欲久違王之左右所以慰山甫即所以諷王也

韓奕序曰尹吉甫美宣王也能錫命諸侯

鄭云韓姬姓之

國也後為晉所滅左傳邲晉應韓武之穆也朱註韓侯初立來朝始受王命而歸詩人作此以送之

郝氏云古者嗣君在喪稱子喪畢以士服見王王策命錫車服歸始為諸侯宣王中興韓侯初立來朝尹吉甫作此詩序不本其事者詩言入覲王命續考則繼世也言勸勉淺懷則喪畢也禮喪畢鹿淺禔革飾詩具故序不贅又云春秋戰國時如平王命晉文侯惠王命齊桓公襄王命晉文公顯王命秦孝公此四王者孱王也有所要挾不得不命非自天子出也如宣王之命韓侯能命亦能討能予亦能奪然後謂之王命有南征北伐平淮會維之功然後有封申錫韓之命也而併及其娶妻者天子有道諸侯秉禮親喪畢入覲歸而後議婚與春秋諸侯在喪親迎者相去遠矣

奕奕梁山維禹甸之有倬其道韓侯受命王親命之續戎祖考無廢朕命夙夜匪懈虔共爾位朕命不易幹不



# 庭方以佐戎辟

朱註賦也毛傳缺季氏云奕奕大而疊也梁山在韓城縣東南其地臨河上當龍門之南非太王遷岐所踰之梁山也按龍門在韓城縣北近黃河禹所鑿者龍門不鑿梁山以北不可田也旬治田出穀稅也倬明貌韓在晉為少梁邑秦晉戰于韓原即此地秦更名夏陽孔云韓是武王之子其封當在成王之時受命受繼世而為諸侯之命也王親命之將命之為侯伯也纘戎祖考七句王命之詞也觀末章云以先祖受命見其先世常為州牧矣無廢朕命即纘戎祖考之命也不易者仍使為州牧也不庭方謂不來朝貢之國鄭云有不庭之方作楨榦而正之以佐助女君女君王自謂也

四牡奕奕孔修且張韓侯入覲以其介圭入覲于王

錫韓侯淑旂綏章簟茀錯衡玄衮赤舄鉤膺鏤錫鞞鞶

淺懷偉革金厄

此述韓侯入覲之事

修長也張大也皆指四牡  
介鎮圭也申侯奉王命為伯

而有介圭之錫韓侯繼祖考為伯其先世亦必有介  
圭之錫入覲執之以合瑞于王也兩言入覲者上

入覲承四牡言誌入覲之所乘也下入覲承介圭言  
誌入覲之所執也淑善也交龍曰旂巾車職云

大旂以封同姓大赤以封異姓大曰以封四衛大麾  
以封蕃國李念茲云旂畫交龍龍東方之物其色

青東方之氣曰淑則淑固青色也韓姬姓大旂正封  
同姓所用綏通作綏朱註綏章染鳥羽或旄牛尾

為之注于旂竿之上為表章者也陳祥道云衛夫  
人之車以翟茀齊襄公方叔之車以簟茀此男女車

蔽之別也 錯說文云金塗也車阨曰銜塗金于軛所以為文 凡冕服皆玄衣纁裳赤舄冕服之舄也

上公九命得服衮冕故屨赤舄與王同也 鉤膺焚纓也用金為鉤以拘之 朱註鏤刻金也馬眉上飾

曰錫今當盧也 莊周言齊之月題月題其象也

鞞革也鞞軾中也 以去毛之皮施于軾之中夾持車

使牢固也 淺虎皮淺毛也幘覆軾也禮記作帶周

禮作幘以淺毛之皮覆軾曰淺幘按獸之淺毛者惟

虎耳 犖馬轡也革轡首之垂者厄通

作檻 鄭云以金為小環往往纏檻之

韓侯出祖出宿于屠顯父餞之清酒百壺其轂維何魚

鼈鮮魚其敕維何維筍及蒲其贈維何乘馬路車籩豆

有且侯氏燕胥

鄭云祖將去而祀輶也。屠地名或謂即杜也。按屠杜同音。晉有杜蒯通作屠蒯。杜在鎬南。韓侯返國不宜出此意。必與蒯里相近。觀事既畢。將便道往行。親迎之禮。故出宿于彼。顯父周之卿士。凡行祖畢。而後餞之。餞畢。乃出宿。今言餞于出宿之後。蓋先記韓侯所擬宿之處。為下章張本。而顯父之餞。仍當在國門外也。當是王使顯父餞之下。文路車乘馬。明其贈之出于王也。謝氏云。申伯之行。王親餞之。韓侯之行。王使顯父餞之。禮有差等也。申伯以王舅。故有優異耳。鄭云。魚鼈以火熟之也。鮮魚中膾者也。穀通作肴。朱註。藪菜穀也。蒲蒲弱也。且多貌。按蒲下入泥白處。今俗呼蒲白。荀竹萌也。覲禮稱諸侯為侯氏。賈公彥云。言諸侯則凡之。總稱言侯氏。則指一身不凡之也。晉疏同音。爾雅訓皆公羊訓。相燕。胥言韓侯與顯父通相。燕樂榮君寵也。

韓侯取妻汾王之甥蹶父之子韓侯迎止于蹶之里百  
兩彭彭八鸞鏘鏘不顯其光諸娣從之祁祁如雲韓侯  
顧之爛其盈門

此章言韓侯觀事畢而行娶妻親迎之禮汾王厲  
王也厲王流于彘彘在汾水之上故時人因以號之  
猶言莒郊公黎比公也按晉侯居翼謂之翼侯晉  
人納之鄂謂之鄂侯鄭叔段出奔共謂之共叔皆是  
類也汾王之甥指蹶父也爾雅云妻之父為外舅  
謂我舅者吾謂之甥郭璞云呼壻為甥孟子曰帝館  
甥于貳室是也爾雅姑之子為甥舅之子為甥妻  
之兄弟為甥姊妹之夫為甥郭璞謂四人敵體更相  
為甥鄭云姊妹之子為甥似以韓姑當之爾雅男  
子謂姊妹之子為出未有以甥名者若外孫則稱彌

甥不單名甥左傳以肥之得備彌甥是也孔云蹶父書字不書國爵則非諸侯下言靡國不到則是為聘使之人故知卿士也蹶父為周卿士意其采邑在畿內去王城不遠迎親迎也毛云諸侯一娶九女二國媵之邾氏云諸侯娶一國之女同姓二國媵之所娶者為嫡二國為媵嫡有娣有姪媵亦有娣有姪合為九女也故曰諸娣

愚按蹶父為汾王之甥甥壻也則蹶父之子王娣妹之所出也詳序之以見韓侯之為國戚蓋王欲以是寵固之也

蹶父孔武靡國不到為韓姑相攸莫如韓樂孔樂韓土川澤訐訐魴鰈甫甫麇鹿嘯嘯有熊有羆有猫有虎慶

既令居韓姑燕譽

此章追述蹶父初為女擇韓之事言蹶父武健故  
能為王聘使無國不到鄭云相視也攸所也相攸  
謂為女擇使得所也姑是蹶父之姓左傳鄭石癸  
曰吾聞姬姑偶其子孫必蕃姑吉人也后稷之元妃  
也亦作吉都人士篇所謂尹吉是也孔云婦人稱  
姓今以姓配夫之國謂之韓姑孔樂韓土深美之  
詞川澤二句連讀以水產言麀鹿三句以陸產言訐  
訐甫甫大也嘆嘆衆也羆熊類羆雌而熊雄熊為  
羆之雄而稱熊猶殺為殄之殺兕為犀之牴而稱兕  
蓋相類為牝牡猶麀與鹿交麀與魚游也猫似虎  
淺毛者也爾雅虎竊毛謂之號猫註云竊淺也季  
氏云魴鰈麀鹿可以供食熊羆貓虎可以供裘韓地  
物產之富如此故為樂土也慶喜也令善也喜其  
已得此善居也燕安也譽樂也謂韓姑之心當亦安

樂而稱其得所也慶令居就相  
攸言燕譽則預度其後日而言

愚按韓多山而亦近河  
故有川澤魴鱖之句

溥彼韓城燕師所完以先祖受命因時百蠻王錫韓侯  
其追其貊奄受北國因以其伯實墉實壑實畝實藉獻  
其貔皮赤豹黃羆

此章當序諸次章之後三章之前因前敘事成文故  
置之至此則韓侯親迎禮畢且歸國矣重誦之以致  
其丁寧之意此詩人行文法也朱註溥大也燕召  
公之國也師衆也韓初封時召公為司空王命以其  
衆為築此城如召伯營謝山甫城齊之類也毛云  
韓之先祖武王之子也受命孔子云受命為一州侯



伯也以下文奄受北國因以其伯觀之則為北國諸侯之伯也蠻夷皆可通稱北稱蠻猶西稱夷史記

匈奴傳居于北蠻是也孔云本立侯伯主治州內因主外夷故曰因也王錫韓侯以今茲言也前章

錫以物此錫以命其追以下命之詞毛云追貊更遠于百蠻今併使轄之所以盡覆此北國也郝氏

云墉壑所部諸國城池也畝田畝籍版籍所部諸國田賦也獻諸國所常貢之物毛云追貊之國來貢

侯伯總領之豹取赤羆取黃當是各取其美亦如裘之重狐白也孔云羆皮言獻則豹羆亦獻獻貌

言皮則豹羆亦獻皮也

愚按宣王命召伯營謝以經略南方命山甫城齊以鎮撫東國此命韓侯為北國伯所以備嚴狁也重其事權使百蠻追貊悉受總轄蓋欲聯絡北方之戎蠻皆為我用耳于是嚴狁內侵不能久駐無為之間導

者而我得以預設備也宣王制北狄之大計在此  
韓先祖受命統治百蠻今使繼其任故曰因時因其  
舊也而復錫之命使兼有追貊凡北方之國皆在所  
轄矣因所轄之地以為之伯蓋比韓先祖昔受之命  
更廣

矣

### 韓奕六章章十二句

據竹書宣王四年命蹶父如  
韓鄒氏云韓為武穆與晉同

祖均屬望國諸侯之向背係焉而又密邇北國為  
一方屏翰命蹶父如韓良有以也蹶父因是以締  
姻而韓侯來朝猶用繼世稟命之  
禮王因命之纘舊服受北國為伯

愚按王命蹶父如韓則蹶父之與韓締姻亦王命  
之以固結之也王急欲得韓以韓為北方之障然  
後專事東南無復北顧之憂是以一伯收百蠻之  
國以九錫紓六師之勞也中興方略亦可觀矣故

此章後即繼  
以江漢常武

江漢 序曰尹吉甫美宣王也能興衰撥亂命召公

平淮夷

嚴氏云周興西北岐豐去江漢最遠故淮夷最難服成王初年淮夷同三監以叛其後又

同奄以叛伯禽就封又同徐戎以叛至厲王之時四夷交侵宣王一命吉甫北方旋定繼命方叔伐蠻荆其後又命召公平淮南之夷命皇父平淮北之夷南方之役至再至三必東土平然後西京安此江漢常武所以為宣王之終事而係之大雅之末也 劉汝楨云宣王淮上之役武功告成也六月北伐首事四夷采芑之南征次之荆蠻既平乃伐淮夷故常武江漢二篇一是自將伐徐一是命將伐淮二師當一時並發王則將本朝之六師而穆公則徵兵江漢以行也 據竹書事在宣王七年

江漢浮浮武夫滔滔匪安匪遊淮夷來求既出我車既設我旗匪安匪舒淮夷來鋪

朱註賦也毛傳缺季氏云召公伐淮夷必自江漢順流而下故所征本江淮之地而併漢言之也古者畿兵不出所以重內調兵諸侯各從其方之便武王伐商實用西土至于征徐以魯平淮夷以江漢滔滔順流貌王氏云以其衆逝也孔云淮夷在東國召公伐淮夷當在淮水之南魯頌所伐淮夷應在淮水之北當淮之南北皆有夷也後漢書云殷武乙衰東夷浸盛遂分遷淮岱薦居中土求索也左傳曰率師以來惟敵是求是也陳少南曰江漢常武二篇同言淮夷以地理考之曰江漢之許是淮南之夷也若在淮北則江漢非由入之路曰率彼淮浦省此徐土是淮北之夷若在淮南則徐土非接壤之地

舒通作舒說文云緩也言武夫皆不敢偷安而怠緩競于用命也朱註鋪陳也陳師以伐之也鄭云來求據至其境故言來來鋪據至戰地故又言來

江漢湯湯武夫洸洸經營四方告成于王四方既平王國庶定時靡有爭王心載寧

湯湯水流之怒如湯沸也洸洸說文云水湧貌言武夫之勇如水之涌也語曰戰勝之威士氣百倍鄭云召公既受命伐淮夷服之復經營四方之叛國從而伐之克勝則使傳遞告功于王孔云知非召公親告王者以下文方云于疆于理則是召公未還故知使人告也經營兼伐叛招攜二義當時江淮之間小國尚多既勝淮夷後乃次第經營之觀下章于疆于理至于南海所經營者非但淮夷而已四方近

淮夷之四方也。庶幸也用兵非人主之美事不得已而興師告成于王曰王國庶定庶云者幸其僅然非以是為功也。

愚按厲王之亂宣王匿召公之家公以子代王死與周公行政號曰共和厲王死乃共立宣王是公于周有再造之功于王有更生之德爰立之勲猶其後也王立而不聞封賞以酬之直至江漢之役式闢四方乃錫山土田加之寵命視後之因時擁戴輒徵封爵者何如耶漢兩吉絕口不言曾孫事猶少有古意耳

江漢之許王命召虎式辟四方徹我疆土匪疚匪棘王國來極于疆于理至于南海

召公伐淮夷之師從江漢往仍從江漢歸故班師至江漢之許適承王之俊命諭以且無歸也虎召穆

公也穆公為康公十六世孫武辟以下四句命之辭也淮南諸國久阻王化今皆入版圖猶開闢之也四方承上章召公告成有四方既平之語敵我疆土者謂我疆域內之土地皆以敵法行之也嚴氏云王者伐叛討貳之後則必去其苛政平其賦斂以慰民心故急於行敵法也朱註極中之表也周禮體國經野以為民極是其義也嚴氏云武事僅定而即行疆理賦稅之法疑于病民且疑于太急王謂非疾非棘蓋什一天下之中正我周之定制欲天下皆于王國來取中焉耳畫疆界為疆分地理為理南東其畝所謂理也蓋疆理為僭竊破壞今盡反其舊耳愚按是時荆蠻淮夷俱平故奉行敵法得至于南海也

王命召虎來旬來宣文武受命召公維翰無曰予小子

召公是似肇敏戎公用錫爾祉

旬徧也宣布也來勤也孔云上章經營四方告成

于王又言于疆于理至于南海召虎大功在此二事

今王命召虎稱叙其功則來旬來宣當指此二事也

自來旬來宣以下至自召祖命皆冊命之文召

公召康公奭也穆公之祖朱註謂昔文武受命惟

召公為損榦今女無曰以予小子之故也但自為嗣

女召公之事耳予小子王自稱也毛云似嗣也

肇始也說文云始開也敏疾也公當依後漢書通作

功說文云以勞定國也用

錫汝福即下章所陳是也

愚按此四句蓋謙言已德不足以比文武而惟冀召

公嗣康公也無曰予小子二句猶云予小子不足道

惟爾克似

其祖耳



釐爾主瓚秬鬯一卣告于文人錫山土田于周受命自  
召祖命虎拜稽首天子萬年

孔云上言用錫爾祉此言錫之之事 釐賜也釋文  
云瓚音賚周書用賚爾秬鬯一卣 瓚者祭時酌鬯  
以獻尸之器其柄以圭為之 鬯釀秬為酒和以鬱  
金合一物而成主秬言謂之秬鬯主鬱言謂之鬱鬯  
按春官鬱人和鬱鬯以實彝而陳之詩及尚書左傳  
皆云秬鬯一卣當祭之時乃在彝未祭則在卣賜時  
未祭故卣盛之 毛云文人文德之人朱註先祖之  
有文德者謂文王也 方授云成王世著作皆出于  
周召二公周公諡文則召公固亦有文人之目此即  
命穆公告其祖康公也 方爰發云告于文人之後世  
所謂宣付史館也 孔云召本岐山之陽采地之名  
且為畿內之國書傳無召穆出封之文則益之土田

大子故耳未成為大國也 羅泌云錫之山川土田  
附庸錫魯公也錫山土田于周受命錫召虎也無益  
地哉 周岐周也康公昔在岐周事文武有功而受  
采地今虎嗣其烈故往岐周賜命 祭統云必賜爵  
祿于太廟示不敢專也 謝氏云錫山川土田必使  
受賜于岐周用文武封康公之禮以待之明賞非宣  
王之賞如稟命于乃祖文武也功非召虎之功如受  
教于乃祖康公也 鄭云拜稽首者受王命策書也  
臣受恩無可以報謝  
但言使君壽考而已

虎拜稽首對揚王休作召公考天子萬壽明明天子令  
聞不已矢其文德洽此四國

對答也揚稱也休美也考成也 對揚二句自勉之  
詞也天子萬壽以下勉王之辭也 對揚王休即書

說命篇所謂敢對揚天子之休命也王之命虎也  
日召公是似曰自召祖命亦欲其無忝厥祖耳自今  
以往當益戮力王室為我祖召公成其終也嚴氏  
云宣王方以武功褒虎而虎乃以文德勉宣王蓋不  
矜已之功而納君于德意度遠矣朱註穆公既受  
賜遂荅稱天子之休命作康公之廟器而勒王策命  
之辭以考其成且祝天子以萬壽也

愚按周家歷世文德至武王以武定天下甫定而即  
偃武修文蓋天下非武功不能定非文德不能洽也  
以文德祝望王者猶是尊祖德也王  
以召祖勉虎虎亦以文武望王耳

### 江漢六章章八句

朱子謂宣王命召公平淮南之  
夷詩人美之鄒氏云江漢明言

伐淮夷常武明言征徐國曰淮夷則淮南淮北兼  
舉之矣常武所云淮浦淮濱指所經歷及駐師之

地未嘗指淮夷也郝氏云成王初立周公東征三年滅國五十而後徐淮定伯禽封土亦為東土重也宣王中興既命召虎經營復勤六師親討東征之兵殆與周相始終也

常武序曰召穆公美宣王也有常德以立武事因

以為戒然

竹書宣王六年召穆公帥師伐淮夷王帥師伐徐戎皇父休父從王伐徐戎次于淮

王歸自伐徐

錫召穆公命自即位至此已五用兵矣

按徐自伯禽時已與淮夷相倚為患費誓曰徂茲

淮夷徐戎並興

穆王時徐夷僭號率九夷以伐宗周

淮徐為患為日久矣

宣王一則遣召虎一則親督六

師緣淮徐互相聲援犄角我故分道出師以破散

其勢且防其侵軼耳

郝氏云召公謂惟德可懷遠

天子躬擐甲胄遠問荒裔不可為常故詩美其事以

常武名篇虞人之箴曰武不可重用不恢于夏家常

武之謂也卒也西周之禍不在淮夷近在西戎乃見詩人獻替之忠

愚按宣王即位凡五出師其他皆命將獨此為親征也王親御戎行目見成功之易將必以武略自喜而輕于言兵故召公以常武名篇明武不可常也王後果以為常黷武不已卒至有千畝之敗召公見之早矣王業之衰由此一勝也故以常武終宣王之武功焉

赫赫明明王命卿士南仲大祖大師皇父整我六師以修我戎既敬既戒惠此南國

朱註賦也毛傳缺夷厲以來威靈不振天下幾不知有王矣宣王親總六師真如雷霆乍驚日月重朗故曰赫赫明明王命宣王親命也以皇父為大將故親命之卿士皇父所居之職也鄭云南仲文王時

武臣也以南仲為大祖者今大師皇父是也命將必  
本其祖者因有世官于是尤顯大師者公兼官也  
蘇氏云南仲文王之所使伐玁狁者也蓋稱其世功  
以褒美之王應麟曰召公是似南仲大祖皆世濟  
其美也然達有充起叛鑒蘇文忠慨焉或附曹羣忘  
漢朱文公怖焉謝氏云宣王命將多取之世臣蓋  
文事武備素講於家庭定亂持危常在其念慮一日  
用之必老成持重不以輕易悞國事也周官自冢  
宰而下謂之六卿大師而下謂之三公既曰王命卿  
士又曰大師皇父周家不特設三公皆兼職而已如  
周公以冢宰兼大師也整齊也言六師知是天子  
親行孔云王既親行仍須命元帥以統領六軍如  
左傳鄢陵之戰楚王雖自親行仍命子反將中軍是  
也脩通作修說文云飭也戎兵也整齊六師具其  
人數以待蒐軍實而講武皆修戎之事言將欲行天  
討也敬者居如守行如戰也戒者臨事而懼不敢

輕敵也

王謂尹氏命程伯休父左右陳行戒我師旅率彼淮浦

省此徐土不留不處三事就緒

毛云尹氏掌命卿士朱註吉甫也吉甫卿士而掌策命蓋為卿而兼內史也皇父三公故王親命之休父六卿故策命之韋昭云程國伯爵休父名也楚語觀射父云重黎氏世叙天地而別其分主者也其在周程伯休父其後也當宣王時失其官守而為司馬氏按司馬遷敘傳自述為休父之後則休父之為司馬明矣郡國志云雒陽有上程聚古程伯休父之國也文王居程故此加為上程朱註上章既命皇父此章又命休父者蓋王親命大師以三公治軍事而使內史命司馬以六卿副之耳左右陳行

欽定四庫全書

日南訓導  
卷十

五十二

四句命休父之辭也左右陳行鄭云使其左右陳列而敕戒之率循也省視也省兼叛而伐之服而

舍之二義一統志云今泗州古徐子國徐大而淮

夷小淮夷即徐州之夷而服屬於徐者留爾雅云

久也處說文云止也三事指六卿十月篇擇三有

事雨無正篇三事大夫是也言此行也王師所臨

有征無戰天子必不久居于外爾三事諸臣為王

居守當各治職事毋曠厥官以待王之歸可也

愚按淮徐倡亂每每並興為犄角之勢師由淮浦以

進則淮自顧之不暇而徐失所恃祇成孤窮之虜耳

此王猶允塞之一端也王師之出其軍需人役器

械等事六卿皆有職掌各行飭辦事事就緒然後師

到成功不致稽延久居于外

此王謂尹氏命三事之詞

赫赫業業有嚴天子王舒保作匪紹匪遊徐方繹騷震



驚徐方如雷如霆徐方震驚

承上章言大將有皇父副將有休父居守有三事王  
乃可以出而親征矣嚴說文云敎命急也舒通作  
紆說文云緩也保安也言王師舒徐而安行也王  
氏云江漢曰匪安匪舒此曰王舒保作彼武夫之事  
此王者之事也  
字承嚴字遊字承舒字匪紹匪遊言其嚴與舒皆適  
也  
宜

愚按積弱之後東土不覩王師之出久矣一旦六飛  
親駕威靈氣象先已奪反者之心首章曰赫赫明明  
此曰赫赫業業皆自見者之震動而言嚴紀律森  
嚴也凡駐軍之地先營壁壘作者即興築之人保則  
其守者也左傳鞏之戰齊侯見保者曰勉之齊師敗  
矣是猶勉其守也舒與嚴對嚴則軍將聽命舒則工

役多壁壘固而守禦備也繹騷謂騷擾不絕徐聞  
王師之出征兵防禦一方為之騷動而不虞師之猝  
自淮浦至也震驚者謂出其不意也已知為天子親  
征如雷奮霆擎天威所臨喪膽褫魄矣上言震驚徐  
方言王師出徐之不意以震驚之下言徐方震  
驚則徐人聞王親征莫知為計而舉國震驚也

王奮厥武如震如怒進厥虎臣闕如虢虎鋪敦淮漬仍  
執醜虜截彼淮浦王師之所

奮說文云翬也謂如鳥鼓翅而疾起也震怒只一  
意如者自詩人窺測之詞朱註進鼓而進之也闕  
奮怒之貌虢虎之自怒者也鋪布也布其師旅也敦  
厚也厚集其陳也仍就也鄭云敦當作屯漬水  
厓蓋阻淮水之厓以為陣也孫臨云仍與頻同蓋  
虎臣更番迭出頻執其衆而囚係之截說文云斷

也即今所謂堵截蓋師據形勝截斷淮浦以立營一  
以絕淮徐之聲援一以防徐戎之奔逸坐守待斃徐  
人所以服也

愚按宣王興師未有伐徐之震怒者當穆王時徐夷  
僭號率九夷以伐宗周西至河上穆王畏其方熾乃  
分東方諸侯命徐偃王主之厲王時淮夷侵雒王命  
虢公長父伐之不克及是尚倔強東方不服王化則  
徐淮蓋久叛而國讐宣王北伐玁狁南平蠻荆四方  
既定乃始出全力以攻此一隅期必蕩平而後已天  
兵已集而猶負固抗師故臨戰而王震怒如此不然  
以茲小醜何至屈萬乘之尊躬夷荒之遠命將諄諄  
方略周備蓋將為一勞永逸之計也淮浦之截必  
堅壁深壘為持久之計故曰王師之所言不敢犯也  
上章所謂保作者其在此乎

王旅嘽嘽如飛如翰如江如漢如山之苞如川之流  
縣翼翼不測不克濯征徐國

嚴氏云此章述移師征徐也鄭云嘽嘽閒暇有餘

之意言其兵不留行如鳥之飛而迅疾如羽之有翰翰羽尖也

愚按必江漢之師已壓淮境而後王始移師逼徐飛翰狀士氣之奮揚江漢狀軍聲之浩汗如山之苞靜則不可撼如川之流動則不可禦也縣縣無間可伺也翼翼左右相救也不測其變化不可測也不克為一戰定徐洗滌汚染與之更新也

王猶允塞徐方既來徐方既同天子之功四方既平徐

方來庭徐方不回王曰還歸

徐光啟云凡平日所為興衰撥亂安內攘外經營于廟堂敷布于海隅者皆王猶也蓋以此致徐方之來非一時兵威能使之然孔云既同與他國同服于王也應即徐夷素所脅從之國今皆率之以來則徐方無梗化者矣朱註江漢篇召公帥師以出歸告成功故備載其褒賞之辭此篇王實親行故于卒章反復其辭以歸功於天子宣王征伐四方皆已平定獨徐方未服及今而始來庭以其平獨在四方之後也回轉也徐方中心誠服不復回轉所謂南人不復反矣徐服則天下從此晏安不須用武王曰還歸不黷武也

愚按猶謀也塞有充塞之義言王之謀猶處處周到無有罅漏信哉大猷之充塞也

常武六章章八句

朱註謂宣王自將以伐淮北之夷鄭氏云淮浦淮濱指王師所

經歷之地非

指淮夷也

愚按淮以北即徐戎矣徐淮連界其曰徐方既同則兼徐淮而言耳

瞻卬序曰凡伯刺幽王大壞也

按凡伯作板詩在厲王末年歷共和

攝政十二年宣王在位四十六年至幽王三年嬖褒姒八年立伯服九年王室始騷中間相距六十餘年此詩之作在幽王時計凡伯之年當為八九十歲矣老成憂國不避禍怨故序于此詩及召旻皆以為此大壞也合正月小旻四詩疑皆為凡伯所作以詩中語意多互為出入也

瞻卬昊天則不我惠孔填不寧降此大厲邦靡有定士

民其瘵蟲賊蟲疾靡有夷屆罪罟不收靡有夷瘵

朱註賦也毛傳缺朱註此刺幽王嬖褒姒任小人以致亂之詩首言昊天不惠而降亂無所歸咎之詞也填說文云塞也謂虐政處處填塞無有寧處郝氏云填顛同危也食苗根者曰蟲賊賊自外至故桑柔之詩刺厲王用小人亦曰降此蟲賊指褒父石父之輩蟲疾言蟲之為苗疾疾自內生則指褒姒也夷平也屆極也謂無有平息止極之時此正上文孔填不寧之實罪罟孔云謂多立科條使人易犯若設網以待鳥獸故謂之罟

愚按凡惡疾惡鬼皆曰厲即指蟲賊蟲疾所謂婦寺者是也蟲賊蟲疾之輩張罟不收使犯者日見其犯前痛未愈新創又加則寧有平復小愈之日乎

人有土田女反有之  
人有民人女覆奪之  
此宜無罪女反收之  
彼宜有罪女覆說之

此章言罪罟之設蓋以刑罰為陷穽因而奪取所有所以成其為蝨賊也土田人民諸侯卿大夫所有無罪有罪兼士民而言彼淫刑以逞惟賄是求于諸侯卿大夫已如此矣又何有于士民乎宜其刑宥之顛倒也反者對正之稱凡事之不當然而然者則謂之反怪之之辭也覆猶反也董仲舒云周室之衰其卿大夫緩于義而急于利亡推讓之風而有爭田之訟則土田之為他人有者多矣正月之詩曰民之無辜併其臣僕則民人之為他人奪者多矣說赦也說文云解脫也周昌年云取非其有其貪之本謀也出入人罪正所以行其貪重在收無罪上言說有罪正以見其獨及無辜之人耳



愚按有罪何以得說必有所以說之無罪之  
收其意亦欲使求有以說耳此極言其貪

哲夫成城哲婦傾城懿厥哲婦為梟為鴟婦有長舌維  
厲之階亂匪降自天生自婦人匪教匪誨時維婦寺

哲智也鄭云謂多謀慮也歐陽子云士多才智  
為謀慮則能興人之國婦有才智干外事則傾敗人  
之國二句泛論古今成案懿厥哲婦厥字方指褒  
如羅氏云巢穴土以居故曰土巢羽翼既成食母  
而飛鴟怪鴟即鴟鵂也亦名鴟鵂與鴟鵂不同彼  
但名鴟以其為鴟屬故謂之鴟鴞耳莊子所謂鴟鵂  
夜撮蚤察毫末晝出瞋目而不見丘山者是也曹  
居貞云階自下而上以漸而升何氏云向者以降  
此大厲歸咎于天其實致厲固有階天不任過也  
寺奄人也婦與寺常相倚為奸朝夕親近人主非導

君子邪則逢君之惡豈有教誨之義納忠之心哉二  
句泛論古今之為婦寺者以明聽信之必致亂也  
愚按十月篇目為艷妻此稱哲婦婦人惑君心以艷  
亂國家必以哲艷而且哲毒莫大矣此如梟鵠所止  
人共惡之以為不祥而王方以之為美美其哲也豈  
知哲所以為梟鵠乎飛耳長目用人之耳目以為  
耳目故目曰長則長舌者亦合小人之舌而出于其  
舌故長也首章降此大厲本指褒姒而姒所以能  
為厲者則舌為之階正月之詩曰赫赫宗周褒姒滅  
之由此舌也婦寺陰性毒驚意之所極不可勸止  
匪教匪誨猶云不可教誨也

鞠人忮忒譖始竟背豈曰不極伊胡為慝如賈三倍君  
子是識婦無公事休其蠶織

鞠窮也說文云窮理罪人也蓋以言窮之也伎害也忒變也謂其心忒害而變詐無常譖不信也竟終也惡惡也譖人于始而終背其實當其譖時豈曰不已甚乎終既不驗亦怡然不以為惡也居貨曰賈蓋坐賣以待售者物相二曰倍三倍獲利之多也公事朝廷之事也

愚按此章蓋言內外交通興獄鬻獄以圖利之事也所用鞠獄之人非極其忒忒則不足以羅織無罪為有罪而奪人之土田人民譖誣告也意其時必興大獄如後之所為告密者其始也受譖以致于獄其竟也納賄而反其辭極者言其始鍛鍊之酷也既極之而知告者之誣斯說之可矣乃因之以作惡惡者曖昧之陰私也蓋以獄為市耳如賈三倍言其鞠獄一次即如行賈一次以志在獲利而已三倍利之厚者也君子指在位者言今在位互相講求惟此是識也婦無公事此不指襄如蓋一時權門外戚之婦媼內

外交通而與聞朝廷刑賞之事皆舍其蠶織以為此蓋賄以成風也

天何以刺何神不富舍爾介狄維予胥忌不弔不祥威儀不類人之云亡邦國殄瘁

毛云刺責也富福也鄭云王之為政既無過惡天何以責王見變異乎神何以不福王而有災害也朱註凡以王信用婦人之故也是必將有夷狄之大患今王舍之不思而反以我之正言不諱為忌何哉弔恤也謂遇災變而不恤也不類猶云不似也人泛指朝中之賢臣朝無人則任羣小之毒亂不至邦國殄滅顛賴不止也

愚按天以況王神以況諸用事之奸言此輩網羅為惡無不富者而刺則專歸于王也國語史伯云中

繒西戎方強王室方騷將以縱欲不亦難乎此所謂介狄也介猶擯介之介猶云介之而使來也予凡伯自謂也是時凡伯年近百旬以先朝耆舊故敢直言犯諫小人所共忌者惟此老耳與凡伯共事之人凋喪已盡無復有同心者人之云亡傷已之孤立無與也

天之降罔維其優矣人之云亡心之憂矣天之降罔維其幾矣人之云亡心之悲矣

罔即首章所言罪罟也罪罟本小人所張而民曰罹其毒無可奈何而謂天實降之以禍此民也優多也言犯之者多也幾殆也言民之犯罪者殆將盡矣此章蓋于民之陷罔而益重人之亡之痛也憂者憂其不知何底止也悲者悲邦國之殄瘁而將亡也

愚按此章所以足上文人之嗟天之降罔吾人無所于逃而我猶不即死者維其優矣優者寬其期也維其幾矣幾者期已近也然我所愛所悲者不在已將死之日而在人之云亡也其人如存猶庶幾可以回天意而保邦國乎

感沸檻泉維其深矣心之憂矣寧自今矣不自我先自我後藐藐昊天無不克鞏無忝皇祖式救爾後

亂水噴出之貌沸說文云水騰涌也檻通作濫汜也水泉從下上出者曰檻泉鄭云檻泉涌出所由者深喻已憂所從來久也徐光啟云蓋自褒人進女之時已憂之矣史蘇識女戎之亂晉方成知禍水之滅火此其類也藐遠也鞏固也此泛論天道雖遠無不可以固之之理固之在法祖而已嚴氏云往

者不可諫來者猶可追所謂式救爾後也幽王大壞至此凡伯尚欲救之拳拳之忠不能自己也陸燧

云通詩生自婦人是疾無忝皇祖是藥

愚按王至此時復何以救意者不求太子于申以結申繒之仇而啓西戎之禍其亡猶可以緩乎則非遠蚤疾去蚤賊不能已也

# 瞻卬七章三章章十句四章章八句

朱註謂此刺幽王嬖褒姒

任奄人以致亂之詩

愚按篇中有時維婦寺一語特泛論婦寺之不可近耳前後文俱無言及寺人之事幽王時寺人亂政亦未有聞者豈即召旻篇所云昏極靡共者耶此詩蓋專刺王嬖褒姒而皇父石父之輩與之朋

比表裏為害也錄詩者以此次于江漢常武之後有深意焉篇中哲夫成城哲婦傾城所謂哲夫指召虎仲山甫皇父休父輩而言也以諸臣經營十數年而始定以褒如一笑滅之而有餘凡伯不幸有期頤之壽親見其興亡故言之痛切如此凡伯身歷任數世親與諸公共事王朝獨逢其敗而痛惜諸公之早亡此亦老人不早死而傷心之至情也

召旻 序曰凡伯刺幽王大壞旻閔也閔天下無如

召公之臣也

蘇氏云因其首章稱旻天卒章稱召公故謂之召旻以別小旻而已 朱註此

刺幽王任用小人以致饑饉侵削之詩 按瞻印言內惑于嬖妄召旻言外嬖于小人蓋內有褒姒之寵則外無召公之臣矣故曰后宮色盛則賢者隱微羣婢倡言則善類啞啞邦國殄瘁恒必由之



旻天疾威天篤降喪瘵我饑饉民卒流亡我居圉卒荒

朱註賦也毛傳缺郭璞云旻愍也虞書說云仁閔覆下則稱旻天疾猶急也謂天以仁閔為德今急

行威怒天篤降喪以下皆疾威之實篤厚也謂厚降以死喪之禍饑饉是也卒盡也居國中也圉邊陸

也季氏云以國事為已事故曰我居圉下文我邦我位皆此義此章言歲饑民散而無可愬則歸禍于

天而已

天降罪罟蟲賊內訌昏秣靡共潰潰回適實靖夷我邦

此章推天所以疾威之由呂氏云天降罪罟所謂天之降罔也訌潰也鄭云訌爭訟相陷人之言

也說文云讀也司馬法曰師多則人讀謂以言相感亂也昏通作闇秣毀陰者也鄭云昏秣皆奄

人也周禮闈人職云掌守王宮門之禁共與供同  
同刑注男女不以義交者其刑官所謂極也毛  
云潰潰亂也謂無有紀綱坊閑聽其肆為邪僻之行  
指姦賊昏極輩也而王使之治國者實以此輩大學  
所謂小人之使為國家也  
靖治也夷平也皆定亂之事

愚按罪咎本姦賊輩所設而姦賊輩實由天降之以  
害國家故歸其咎于天靡共者言闈人自有職掌  
今不供其職而與姦賊輩  
相表裏以干預政事也

臯臯訛訛曾不知其玷兢兢業業孔填不寧我位孔貶

毛云臯臯頑不知道訛訛窳不供事也左傳謂魯  
人之臯臯緩也訛言不肯用力勤事徒騰口說而已  
愚按臯臯訛輩乃用事小人所留以充高位者尸素之  
流也臯臯一切迂緩訛訛徒事坐談襲為大臣之度

而曾不知其玷玷者玷其位也存心兢業者憂填于  
中無有寧日空自多憂過計固不如此輩從容有大  
度耳宜我  
位之貶也

如彼歲旱草不潰茂如彼棲苴我相此邦無不潰止

此承上章用舍失宜而言蓋人才用之得宜則如楫  
櫓之盛日見其蕃用失其宜則如歲旱之草同歸消  
滅而已毛云潰遂也嚴氏云谷風有汎有潰潰  
訓怒小旻是用不潰于成此章草不潰茂潰皆訓遂  
潰潰回適無不潰止潰皆訓亂按水之潰者其勢橫  
暴而四出故怒之甚者為潰怒遂之甚者為潰遂亂  
之甚者為潰亂皆一理也苴蒯屬可以作屨其質  
輕微隨風棲泊無有定處猶所云轉蓬也如彼棲苴  
言其中小有才能者皆不能自立與時浮沈轉移而  
已李氏云無不潰止言不至于潰不止也陳偉

云由邦之無人  
以知其必潰

維昔之富不如時維今之疚不如茲彼疏斯糲胡不自

替職兄斯引

毛云昔之富謂富仁賢也今之疚謂今則病仁賢也  
時是也茲此也疏通作粗糲米也米之率糲十

糲九鑿八侍御七糲蓋少精  
于糲矣替爾雅云廢也

愚按承上章言人才之凋落如此追周昔之盛世富  
于才不如是之空虛也即人才之在今可謂病矣亦  
不如此一時之特甚也替猶代也彼疏斯糲謂彼  
此相去無幾也況者似也莊子曰每況愈下言近似  
也謂此人既不肯求人以自代而所引者惟是已近  
似之人斯引之而已職者言其意專主于此也

池之竭矣不云自頻泉之竭矣不云自中溥斯害矣職  
兄斯弘不裁我躬

鄭云頻當作濱池水之溢由外灌焉今池竭由外無  
益者喻王猶池也政之亂由外無賢臣益之泉者中  
生水則益深水不生則竭喻王猶泉也政之亂又由  
內無賢妃益之溥猶徧也言其為害徧及內外皆  
蟲賊為之也引言其  
憂之長弘言其憂之大

愚按池竭自頻外有賊之者也泉竭自中內有害之  
者也蟲賊與蟲疾表裏為姦故王澤日竭而王不知  
也職兄斯弘指貪位者而言養亂之人也職兄斯  
弘指用事者而言造亂之人也要之斯弘之兄即上  
文斯弘之兄也蓋其所引之人繼起用事為害  
益弘而引之者猶云非我所為以自逃咎得乎

昔先王受命有如召公曰辟國百里今也日感國百里  
於乎哀哉維今之人不尚有舊

此章望王用舊人以救亂也鄭云先王受命謂文  
王武王時也召公召康公也言有如者昔時賢臣多  
非獨召公也陳櫟云此詩及瞻卬篇末有拳拳望  
治之意前詩望其改過而無忝皇祖此詩望其改圖  
而擢用舊人審如是則否猶可泰危猶可安也孔  
云于感國之上不言無賢臣者以不尚有舊義見于  
下故空其名以下句互而知之


愚按凡伯與召穆公同朝所稱召公即召虎而謂昔  
先王受命者厲王亡國宣王更立中興亦可謂之受  
命也江漢之詩曰式辟四方于疆于理至于南海非  
辟國百里乎以凡伯歷事厲王今猶在朝況與召公

同時共事為宣王之舊人豈盡無有者乎悲其有舊而不用也

召旻七章四章章五句三章章七句

朱註亦以先王為文武召

公為召



公之亡而亡也

蕩之什十一篇九十二章七百六十九句

王流彘周室由召穆公以再造宣王中興  
南征東略召伯之功為多纔一傳而即有幽王亡  
國之禍詩人親見其興廢安得不思召公乎厲王  
之亂雅有召公故國亡而不亡今無其人矣題曰  
召旻周之以召

田間詩學卷十